




The Catholic Reporter insait
P7,8,21,22

Palamen bai
sindaun gen long
Mas 22, 2016 - P2

PNG Air em i
balus bilong
PNG - P20



NCC nidim K2.3 milien long Guam festival



“Dispela mani bai go long baim balus sata, hotel, kaikai, insurens, ol yunifom, haus sik na ol arapela samting bilong moa long 170 manmeri husat bai makim kantri bilong yumi na go long dispela bung”.

Aja Potabe i raitim

NESENEL Kalsurel Komisin (NCC) i laik salim klostu long 200 manmeri olsem deleges bilong PNG i go long namba 12 Pasifik Festival ov Ats long Hagatna, Guam tasol ol i nidim K2.3 milien long salim dispela deleges.

Ekting Eksekutiv Dairekta bilong NCC, Dokta Jacob Simet i tok NCC i salim tok save i go pinis long Minista bilong Kalsa, Ats na Turisim.

NCC bai mekim wanpela fan resing o kopret dina long Dynasty Restuaran, Pot Mosbi long Fraide Novemba 13 long bungim mani long helpim dispela deleges.

“Dispela mani bai go long baim balus sata, hotel, kaikai, insurens, ol yunifom, haus sik na ol arapela samting bilong moa long 170 manmeri husat bai makim kantri bilong yumi na go long dispela bung,” Dokta Simet i tok.

Em i tok PNG deleges bai gat ol grup i kam long Hela Provins i makim Hailans rijon, Wes Sepik Provins i makim Momase rijon, Atonomus Rijon ov Bogenvil i makim Niugini Ailans rijon na Oro Provins i makim Sauten rijon.

Ol kalsa grup bilong Hela na Wes Sepik i no stretim ol samting hariap. Grup i kam long Oro na Bogenvil i stretim ol samting pinis na i stap redi tasol long go.

Dokta Simet i tok Praitim Minista Peter O’Neill i save long dispela festival bikos em i bin wanbel na givim tok orait long presiden bilong Guam long larim PNG i go long dispela bung.

Dokta Jacob Simet...Ekting Eksekutiv Dairekta bilong NCC na Siaman bilong PNG Ogenaising Komiti bilong namba 12 Pasifik Festival ov Ats long Guam.

I go moa long pes 2...



Supporting PNG MADE

76003555

www.bmobile.com.pg

Connect with us on

Save money every minute on the friendlier network

Switch to bmobile-vodafone at a store near you.

Palamen bai sindaun gen long Mas 22, 2016

LIDA bilong Gavman Bisnis NA Fainens Minista James Marape i skruim sindaun bilong Palamen i go moa long Mas 22, 2016.

Las wik Fonde taim ol memba i bin sindaun na bung long Palamen, planti manmeri i bin ting ol Oposisen bai rausim O'Neill-Dion gavman, kamapim nupela gavman na makim nupela praim minista tasol dispela i no bin kamap.

Oposisen Lida Don Polye na Deputi Oposisen Lida Sam Basil i bin stretim gen ol asua i stap long notis pepa bilong kirapim vot i no gat bilip egensim Praim Minista Peter O'Neill, tasol Pipols Nesanel Kongres (PNC) Pati bilong O'Neill i yusim namba bilong ol memba long pati long abrusim dispela vot i no gat bilip we planti ol manmeri i bin ting bai kamap las wik.

Mista Polye i tok em i no wanbel long Ekting Palamen Spika Aide Ganasi na Minista Marape i skruim sindaun bilong Palamen i go long mun Mas, neks yia.

"Praim Minista i pret long vot i no gat bilip egensim em yet. Em i tok olgeta gavman minista na memba i stap baksait long em tasol em i gi-



Palamen Nius wantaim Aja Potabe

aman,"Mista Polye i tok.

Mista Polye na Mista O'Neill i wanbel long wokbung wantaim long sampela ol samting tasol long narapela samting, tupela i no wanbel long wokbung wantaim bikos tingting na lukluk bilong tupela long ol dispela samting i narakain.

"Long kain samting olsem san i bagarapim ples na we bilong stretim laip bilong ol manmeri husat i kisim taim long El Nino na drai sisen, mitupela Praim Minista bai wokbung wantaim. Tasol long ol arapela samting we Oposisen i



Sauten Hailans Gavana William Powi and Oro Gavana Gary Juffa i sanap ausait long Palamen Haus las wik Tunde. Palamen bai sindaun gen long Mas 22, 2016.

lukim olsem em i no stret, mipela bai no inap saptim gavman,"Mista Polye i tok.

Mista O'Neill i tok ol pipel i gat bilip long gavman bikos planti manmeri i lukim ol gutpela senis i kamap long wan wan ples bilong ol.

"Ol pipel i bin laikim senis – gutpela senis long kirapim kantri. Na dispela gavman i wok long bringim ol dispela sevis we ol pipel i no bin kisim long planti yia i go pinis.

"Ol laikim fri edukesen, fri helt na medikel sevis, gutpela rot na bris, daunim ol asua bilong lo na oda, kirapim iekonomik divelopmen, na kamapim moa bisnis.

"Dispela gavman i mekim ol dispela wok na ol wan wan memba husat i makim maus bilong pipel i sanap strong wantaim PNC Pati long strongim gavman.

"Ol sampela memba husat i hangre long pawa i wok long toktok planti na mekim kain kain samting nogut long bagarapim gutpela wok gavman i mekim long kirapim kantri bilong yumi na senisim laip bilong manmeri bilong yumi,"Mista O'Neill i tok.

Namah: Polis no ken daunim fridom



Memba bilong Vanimo-Green Belden Namah.

VANIMO-GREEN Memba Belden Namah i tok ol polisman i no ken stopim ol raits na fridom bilong ol manmeri long tokaut long ol samting we ol i lukim gavman i no mekim stret.

Mista Namah i mekim dispela singaut long las wik Trinde taim em i harim olsem sampela polisman long Pot Mosbi i stopim ol manmeri

husat i bin laik mekim protes mas egensim gavman.

"Ol polisman i noken daunim ol raits bilong manmeri. Ol manmeri bilong dispela kantri i gat rait aninit long Mama Lo bilong PNG long bung wantaim na autim tingting bilong ol long ol samting we ol i lukim i no stret.

"Taim ol pipel i lukim olsem gavman i no mekim sampela samting stret na taim ol i laik bungim tingting na kamapim pisful protes, ol polis man i no ken stopim ol manmeri long autim tingting bilong ol,"Mista Namah i tok.

Em i tok aninit long Mama Lo bilong PNG, seksen 97 i givim tok orait long ol polisman long karimaut ol wok bilong ol stret na i no ken kisim braiberi o mekim wantok sistem pasin.

Mista Namah i mekim dispela toktok bihain long bos bilong NCD Polis Ben Turi i no bin givim tok orait long sampela ol NGO na sivil sosaeti grup long protes long Pot Mosbi.

NCC nidim 2.3milien long Guam festival

I kam long pes 1...

Dokta Simet, husat i siaman bilong PNG Ogenaising Komiti bilong dispela festival, i tok Praim Minista O'Neill i givim tok orait pinis long salim PNG delegesen i go long dispela festival.

Dokta Simet i tokim ol nius manmeri long dispela wik Tunde olsem dispela namba 12 Pasifik Festival ov Ats long Guam bai

kamap long Me 22 – June 4, 2016 na em bai bikpela bung stret – i no olsem narapela festival i kamap pastaim long Solomon Ailan (2012), Amerika Samoa (2008) na Palau (2004).

"Kantri Guam yet i redim ol samting bilong kamapim dispela festival. Moa long 2, 500 manmeri i kam long 27 ailan kantri na ol teritori bai go soim kalsa, ats,

singsing, drama, danis, kraft na pasin tumbuna bilong ol long dispela bung long Hagatna,"Dokta Simet i tok.

Pasifik Festival ov Ats i save kamap bihain long olgeta 4-pela yia.

Long yia 2012, Solomon Ailan i bin holim namba 11 festival long Honiara na long yia 2016 Guam bai holim namba 12 festival.

PNC rausim Kouza

PIPEL'S Nesanel Kongres (PNC) Pati bilong Praim Minista Peter O'Neill i rausim Memba bilong Lae, Loujaya Kouza.

Mis Kouza i no moa

memba bilong PNC Pati bihain long Deputi PNC Pati lida na Fiseris Minista Mao Zeming i tokaut olsem ol i rausim Memba bilong Lae i go aut long pati las wik.

Zeming, husat i Memba bilong Tewai-Siassi insait long Morobe Provins, i tok Mis Kouza i bin mekim sampela nogut toktok egensim gavman.

"Toktok bilong Kouza i

no rispekim gavman. Em i toktok egensim PNC Pati na PNC gavman. Dispela i no stret long pati polis na pati i mekim disisen long rausim em,"Mista Zeming i tok.

Nupela balus bai go long Tari



NUPELA balus ATR 72-600 bilong PNG Air nau bai flai raun i go long Tari.

NUPELA balus ATR 72-600 bilong PNG Air bai go undaun long Tari ples balus long Hela Provins long Fonde Novemba 12.

Komesal Sels Opisa Philly Tokania i tok dispela nupela balus bai pundaun long Tari na Moro ples balus long dis wik Fonde na kam bek long Pot Mosbi.

Em bai karim ol nius manmeri, eakraf ensinia na ol sinia eksekutiv bilong PNG Air i go long dispela tu-

pela ples balus .

Ol pilot i wok long testim dispela balus long olgeta ples balus insait long kantri we pastaim Airlines PNG i save go.

Ekting Hela Provinsal Edministreta, William Bando i tok em i amamas long lukim dispela balus i pundaun long Tari.

Mista Bando i tok dispela balus bai sevim ol pipel bilong Hela provins na em i tok tenkyu long PNG Air i larim dispela nupela ATR

72-600 balus i ran go kam long Tari.

"Mi laik tok tenkyu long PNG Air long larim dispela balus i kam long Tari. Em bai sevim mipela gut tru na mi amamas stret.

"Mi laik tokim ol manmeri na yut long lukautim wok manmeri, opis na ol samting bilong dispela balus bikos PNG Air i givim sevis long mipela ol manmeri long ples,"Mista Bando i tok.

Polye: 2016 Nesenel Baset i no stret

OPOSISEN Lida Don Polye i tok 2016 Nesenel Baset em i no stretpela mani plen bilong kantri tasol em i giaman baset we gavman i yusim long giamanim ol manmeri.

Mista Polye i mekim dispela toktok long las wik Tunde taim em i lukluk long ol baset pepa na em i toktok long dispela baset.

“Mi bin tok pinis taim Oposisen i bin bekim toktok long 2015 Nesenel Baset long Novemba las yia.

“Dispela Nesenel Baset bilong yia 2016 i no lukluk long ol pipel tasol em i lukluk long ol samting olsem infrastraksa.

Mista Polye i tok ol pipel bai ting olsem mani gavman i basetim long kirapim ol rot, bris, ples balus na sip bris em i wanpela gutpela developmen gavman i bringim i kam long kirapim kantri na senisim laipstail bilong pipel.

“Nogat. Ol pipel no ken longlong na ting dispela ol mani bilong kirapim rot na bris bai tru tru mekim gutpela wok long senisim ples.

“Em ol gavman i giamanim yumi. Planti bilong dispela mani bai go bek long gavman na ol bisnis patna bilong ol.

Mista Polye i tok sapos gavman i bin tingting long kirapim kantri na senisim laip bilong manmeri, Praisin Minista Peter O’Neill na Tresera Patrick Pruaitch inap long mekim rot i go insait long ol ples we kopi, kopra, welpam, ti na ol arapela plantesen i stap.

Gavman i no luksave yet long Mt Kare papagraun

GAVMAN i no luksave yet long ol papagraun tru bilong Mt Kare gol na silva maining projek.

Mt Kare gol na silva maining projek i stap insait long boda bilong Enga Provins tasol sampela papagraun long Hela Provins sait tu i gat hap graun bilong ol i stap long dispela eria we Ekploresen Laisens (EL) 1093 i karamapim.

Wanpela wokman bilong Mineral Risos Atoriti (MRA) i tok gavman i no luksave yet long husat ol man, grup o klen i papagraun bilong Mt Kare gol na silva maining projek.

Dispela wokman bilong MRA, husat i les long autim nem bilong en, i tok Nesenel Kot i bin karimaut midiesen long dispela yia Julai na Ogas long painimaut ol klen husat i gat graun long ples we EL 1093 i stap.

“Ol papagraun long Hela na Enga sait wantaim i bin bung na dispela midiesen i painimaut 19 klen. Tasol gavman i no luksave yet long wanem klen em i papagraun,” dispela MRA wokman i tok.

Mt Kare em no bikpela tasol em i namel sais maining projek na maining opresen inap long kamap bikpela long taim yet, tasol planti papagraun i wok long paulim gavman na maining kampani Summit Development Limited (SDL).

SDL em i wanpela liklik maining kampani bilong Australia na EL 1093 i stap wantaim em. Planti ol papagraun long Hela na Enga sait wantaim i tok SDL i bin mekim gutpela wok long kirapim dispela maining.

Sampela papagraun long Enga i tok ol i laik kisim dispela EL 1093 na ol yet i laik kamapim maining projek. Tasol MRA i tok maining laisens i no olsem soka bal we ol man i ken kikim i go kam long laik bilong ol yet.

“EL 1093 i stap wantaim SDL. Taim bilong laisens i pinis tasol ol i wetim Maining Minista Byron Chan long rinuim dispela laisens. Na MRA bai no inap givim dispela laisens fri long ol papagraun,” em i tok.

Wanpela papagraun kampani long Enga sait – Mt Kare Mine Development Corp - i tok ol i makim maus bilong ol papagraun na ol i laik kisim dispela laisens EL 1093.

Siaman bilong dispela kampani Pes Watai i wok long bungim ol man na ting ting long kirapim dispela maining projek.

Tasol ol papagraun long Hela i no luksave long dispela kampani bilong Watai.

Mausman bilong Heli klen long Hela, David Tabi i tok ol papagraun long Hela sait tu i gat dispela kain ambrela kampani na ol i no luksave long dispela kampani bilong Watai.

Mista Tabi i tok Watai i no ken giamanim gavman na paulim het bilong kampani taim Nesenel Kot i painimaut ol trupela klen na papagraun bilong Mt Kare.

SDL i tok laisens EL 1093 i pinis na ol i tingting long rinuim gen. Tasol i gat sampela toktok tu i kamap olsem SDL bai salim dispela laisens na givim i go long narapela nupela maining kampani.

Prais bilong gol long intenesenel maket i go daun na SDL i no gat mani long fanim opresens long Mt Kare, wanpela ripot i tok.

Dispela i soim olsem SDL i no stap long gutpela mak long kirapim Mt Kare maining projek hariap tru.



Oposisen Lida Don Polye i autim tingting bilong Oposisen long 2016 Nesenel Baset.

Thank you **BSP!**

“**BSP Home Loan** helped us to purchase our first house. Our son now has his own room. We have our own kitchen and a whole yard to host a family Kaikai.”

David Jonah
First Home Buyer



A range of home loan products for first home buyers and existing home owners.

	 FIRST HOME OWNERSHIP	 HOME LOAN
	1. Maximum Loan K400,000	1. Flexible Loan Amount
	2. Interest Rate 4% pa	2. Interest Rate 8.45% pa
	3. Maximum Term 40 years	3. Maximum Term 25 years
	4. Equity 10%	4. Equity 30%



☎ 320 1212 / 7030 1212 - 24/7
 ✉ servicebsp@bsp.com.pg
 🌐 www.bsp.com.pg   



Rilif saplai i no inap

Sapotim ol wok bilong strongpela san long Pasifik

Esther Bralyn Wani i raitim

OL pipel i wok long kisim helpim long kaikai bikos long strongpela san na ais i pundaun long sampela hap bilong kantri.

Nesene! Disasta Opis i salim ol kaikai i go long ol distrik i kisim bikpela bagarap olsem tripela mun i go pinis.

Provinsal Disasta Kodineta bilong Enga provins, Leopas Roa i tok ol i salim ol beg rais tasol i go long ol pipel olsem tripela wik i go pinis.

'Mipela i salim olsem

12, 600 beg rais i go long ol distrik kodineta we ol yet i givim ripot long hamas beg ol i laikim na mi salim go,' Mista Roa i tok.

Long wankain taim, wankain pasin i kamap long Westen Hailans provins we ol pipel long Tambul Distrik i kisim bikpela bagarap long strongpela san na ais tu.

Wanpela lida bilong Lowa Kagul LLG insait long Tambul Distrik, Fidelis Kunamp, i tok Cariats PNG, Australia na Nu Silan wantaim ol opisa bilong gavman i go lukim ol bagarap i kamap long ples.

'Caritas PNG i givim mipela 5kg beg rais long wan wan haus. Gavman i givim mipela 10 kg beg rais, 4-pela liklik tin pis, 4-pela nudel na liklik oil,' Mista Kunamp i tok.

Em i tok moa olsem ol i no kaunim namba bilong ol pipel i save slip long wanpela haus tasol ol i kaunim ol namba bilong ol haus we sampela i gat planti pikinini na sampela i gat liklik namba.

Mista Kunamp i tok, 'Dispela pasin i no stret na mipela i gat planti pikinini na long wankain taim mipela i lukautim ol

sumatin i kam skul long nupela sekendari skul i no gat domitori yet i kisim taim bikos rais i pinis insait long tripela de.

Em i tok long go kisim rais long Tambul distrik stesin ol i yusim mani bilong ol yet long pulapim fiul long K400 we i gutpela mani long yusim long kain taim nogut.

Ol i no save wanem taim bai namba tu saplai bai go long ol o nogat, tasol ol dispela saplai ol i kisim i pinis long taim na kaukau bikpela long gaden i bagarap pinis long ais.

AUSTRALIA bai i helpim ol Pasifik ailan kantri taim ol i go het long abrusim ol salens we El Nino i kamapim.

'Mi bungim Foren na Imigresen Minista bilong Papua Niugini, Rimbink Pato long ol Hailans bilong PNG na lukim ol hap we i kisim bikpela bagarap long ol kaikai long gaden long dispela strongpela san na ais i pundaun,' Foren Afes Minista bilong Australia, Julie Bishop i tok.

Australia bai givim \$9 milien mani long helpim ol komyuniti na ol gav-

man long Pasifik long redi na abrusim ol bagarap bilong El Nino.

Long wankain taim, gavman bilong Australia bai i givim \$5 milien mani long mekim gut sekyuriti bilong kaikai bilong 500, 000 pipel na givim ol sid bilong ol kaikai bai inap long gro insait long strongpela san.

Long mekim gut wara na klinpela hap bilong 6-pela provins long bung wantaim ol non gavman ogenaesen (NGO), sapotim ol grup i no gat strong olsem ol pikinini, ol meri na ol lapun insait

long ol sios helt sevis, sapotim Nesene! Disasta Senta, ol NGO na ol lokal sios long mekim gut long ol lojistik na wok bung na givim ol bikpela mep bilong ol bagarap i kamap long wara, ol plan na ol kaikai wantaim helpim bilong Jiosains Australia.

Narapela \$4 milien bai ol i sapotim ol intanesene! humeniterian bilong NGO long Pasifik, we El Nino i bagarapim kaikai na wara.

WHP pipel long Mosbi i sapotim ol pipel i kisim bagarap long El Nino

Risets i impoten long kamapim save - Minista Tabar

Esther Bralyn Wani i raitim

OL pipel long Westen Hailans Provins (WHP) aninit long WHP El Nino Draut Apil Komiti long Pot Mosbi i soim sapot bilong ol long helpim ol pipel i kisim bagarap long strongpela san na ais long WHP.

Ol pipel bilong WHP i stap long PNG na ovasis i kamapim dispela long olgeta pipel husat i wari long ol pipel i kisim bagarap i ken givim mani o kaikai long soim sapot bilong ol.

Dispela longpela wok-abaut em i wanpela bilong ol rot long bungim mani long sapotim ol pipel i kisim bagarap long El Nino. Wokabaut i bin stat long Sogeri ausait long Sentral provins na i pinis long Ela Beach long Nesene! Kapitol Distrik long 31 Oktoba.

Siama bilong dispela komiti, Desmond Kipa i tok, "Bikpela as tingting bilong dispela wokabaut em long bungim mani long sapotim ol pipel na long mekim awenes long ol pipel long kisim sapot bi-



Ol pipel i statim longpela wokabaut long Sogeri na bai pinisim long Ela Beach.

long ol WHP komyuniti long Pot Mosbi."

Mista Kipa i tok olsem dispela longpela wokabaut i bin olsem 37 kilomita tasol- ol i wokabaut na traim long pinisim dispela salens na lukim olsem ol i ken abrusim ol narapela salens long laip bilong ol tu.

Moa long 150 pipel insait long Pot Mosbi i bin lusim Boroko Polis Stesin long 4 klok moning wantaim ol risev polis bilong NCDC, na wanpela St Johns embulans i bihainim ol pipel inap wokabaut i pinis.

Neks bung bai kamap long Nature Pak we ol bai

fraim ol liklik kaikai long salim na bungim mani bilong baim ol rilif saplai. Bi-hain long dispela liklik kaikai bai ol i holim wanpela kopret dina bilong ol bikman long Pot Mosbi long mekim mani bilong dispela disasta rilif.

Dispela komiti bai

bungim olgeta mani na givim long Caritas PNG long go het na baim kaikai bilong ol pipel i kisim bagarap long WHP.

Dispela agrimen i kamap namel long Caritas PNG, Katolik Bisop Konprens na Maun Hagen Katolik As-daisos.

OLGETA bikman na meri bilong sains i bung long Sains na Teknologi Stretejik Plen Woksop long toktok long ol risets we ol i ken wokim long helpim gavman long senisim sampela polisi na helpim kantri long go het.

Minista bilong Haia Edukesen na Risets Sains, Malakai Tabar i askim ol sampela kwesten long dispela woksop long sampela rot we sains i ken givim edvais long gavman long polisi, na tok-tok long ol salens we kantri i lukim. Minista Tabar i tok, 'Risets i mekim bikpela wok long sapotim developmen bilong nupela save na save i stap pinis long bildim wanpela sosaiti i gat save.

Long planti kantri i no develop yet na ol ikonomi i kamap, ol invesmen long risets i kamapim nupela save na ol tingting, ol nupela wok painim aut na ol teknologi long ol indastri, helt, egrikalsa, fiseris na eneji sekta.'

Em i tok putim risets go pas i ken kamapim ol man i gat save na kisim bikpela trening wantaim ol save long li-dasip, developmen bilong tingting gut na stretim ol hatpela hevi na wok i go het long bihain taim.

Minista Tabar i tok risets i impoten long luksave long developmen bilong sekyuriti bilong kantri na gutpela ikonomi bilong wanpela kantri.

'Em i impoten olsem PNG i mas inves long Sains na Inovesen sapos yumi i laik resis wantaim ol narapela kantri long taim bihain,' Minista Tabar i tok.

Sensasip Opis bai wokbung wantaim midia

SENSASIP Opis i gat bikpela tingting long wokbung wantaim ol nius manmeri long givim gut ol awenes toktok.

Sif Sensa bilong Sensasip Opis, Steven Mala i tok planti manmeri i no save long wanem kain wok stret dispela opis i save mekim.

"Long larim ol manmeri i luksave gut long wok mipela i save mekim, em i gutpela long dispela opis i kamapim patnasip wantaim ol midia ogenaesen na ol nius manmeri," Mista Mala i tok.

Long dis wik Fonde na Fraide, Sensasip Opis bai holim wanpela



Sif Sensa Steven Mala (lephan) i toktok na Deputi Sif Sensa Jim Abani i harim.

woksop long Gaire ausait Pot Mosbi long skulim ol nius manmeri long wok bilong ol.

Ol sampela biknem nius manmeri tu bai go toktok long dispela bung.

Mista Mala i tok bihain long dispela woksop, ol nius manmeri bai save gut long wok bilong Sensasip Opis na ol i bai skruim toktok na infomesen i go moa long ol manmeri.

"Mipela i amamas long skulim ol nius manmeri na tokim ol long wanem kain wok mipela i save mekim," Mista Mala i tok.

Em i tok Sensasip Opis i save

glasim ol toktok na piksa bilong ol muvi na pilai i save kam insait long kantri.

Sapos ol piksa o muvi i no gutpela long larim ol manmeri o pikinini i lukim, Sensasip Opis i save tambuim.

"Mipela i save sekim na glasim gut ol konten bilong ol muvi. Mipela i hat long sekim wanem samting i stap long intanet bikos PNG i no gat wanpela lo bilong sekim na tambuim ol samting olsem piksa nogut," Mista Mala i tok.



PIH Saveman Nius

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

The threat of Brain Attack!

Definitely when a relative suffers a stroke, it is a major emergency and all tambu around the patient will strive to get the ambulance to pick-up the patient. The Pacific International Hospital of Port Moresby has a 24/7 Emergency Room, and our doctors of the Emergency Room provided the information below so that the family of a stroke patient could tell if it is a stroke he or she is undergoing.



Doing regular exercise can help prevent one from becoming a stroke patient as above pictures tell the story.

alcohol intake, eat a low-fat healthy diet, keep to an ideal weight and have regular exercise.

If you have been found to have hardening of the arteries to the brain, you may be advised to have tablets to prevent blood clots (thrombosis) forming. Aspirin can do this, and only a small dose is needed. Garlic tablets are reported to prevent clots, and special blood-thinning tablets called *anti-coagulants* (commonly warfarin) can be prescribed.

What is the treatment for stroke?

It is important to call an ambulance and get to a stroke unit as soon as possible. Follow the FAST rule:

- F = facial weakness (ask the person to smile)
- A = move arms (raise both arms)
- S = speech (speak a simple sentence)
- T = time – act quick if there is a problem with any or all of the above.

An injection within 3 hours may dissolve a blood clot.

Intense rehabilitation to get limbs and speech working again is important. Ideally physiotherapy should be commenced in the first 2 days.

Pacific International Hospital has already received a number of stroke cases this year at its new 3-Mile facility.

According to Dr. Ronnie Koli of PIH ER, there are at least 4 days each week that a new stroke patient is admitted to PIH ER.

PIH also has the laboratory facilities to check precisely your blood cholesterol and also diabetes. And of course, our emergency room is always on the ready.

What is a stroke?

A stroke, also called a "brain attack", occurs when an area of the brain is damaged following interruption to its blood supply. This results in deterioration of the mental and physical functions controlled by that particular area.

What is the cause?

There are three main causes:

Thrombosis – a clot forming in the artery to the area

Embolus – a small clot from elsewhere blocking the artery

Haemorrhage -- bleeding into the brain (unlike the others, where the artery is blocked)

The risk factors for stroke are:

- High blood pressure
- High Cholesterol
- Diabetes
- Smoking
- Heart Disease

What are the symptoms?

The symptoms depend on the area of the brain affected and the cause. A haemorrhage usually has a sudden onset and a less favourable outlook. Sometimes a stroke is mild and the effects pass off in a day or so.

- Symptoms include:
- Unconsciousness
 - Confusion
 - Loss of power of speech
 - Loss of movement of the part of the body (e.g. on one side of the body)
 - Double or blurred vision
 - Difficulty understanding questions
 - Headache
 - Dizziness
 - Difficulty walking or using arms
 - Numbness or a weak feeling on one side of the body (face, arm or leg)

How common are strokes?

They are very common, espe-

cially in people over 65 years and more so in males. In Western countries they are the third most common cause of death and after heart attacks the second most common cause of sudden death. Those at special risk are those with high blood pressure, diabetes or high blood cholesterol and heavy smokers.

How can strokes be prevented?

The risk factors need to be checked, especially high blood pressure and cholesterol, which must be kept under control. Other things to do are to avoid smoking, avoid excessive

SUFFERING FROM JOINT PAINS, HEADACHES OR BACK PAIN, BUT DON'T KNOW THE EXACT CAUSE? HAVE YOU BEEN ADVISED AN MRI SCAN BY YOUR DOCTOR?

NOW, YOU DON'T HAVE TO TRAVEL OVERSEAS!

CELEBRATING ONE YEAR OF THE COUNTRY'S ONLY MRI FACILITY!!

200 MRI scans done since inception in 2014.

MRI is a non-invasive diagnostic test that uses strong magnetic field and radio frequency waves to see inside your body.

What can it do for you?

- Find disease or abnormal conditions

- Find tumours
- Study brain and spinal cord imaging
- Study joint disorders, such as arthritis
- Detect problems in heart or blood vessels
- Detect sports injuries



Man i dai long Lae protes

PROTES i bin kamap long Lae, Morobe long Mande i mekim na 5-pela lain i bin kisim bagarap na wanpela i dai.

Dispela protes i no kamap long stretpela wei na ol polis long Lae i laik stopim ol tasol, ol pipel long Morobe i paitim ol.

Ol 5-pela lain husat i bin kisim bagarap i bilong Hailans na wanpela bilong ol em i meri.

Ol i bin kisim dispela 5-pela lain i go long Angau Memorial haus sik na wanpela i dai long hau sik.

Ol lain bilong ol manmeri i kisim bagarap i traim long blokim rot long 4 mail na i laik protes tasol, ol polis i stopim ol.

Metropolitan Komanda Suprintenden, Anthony Wagambie i

tok olsem ol polis i no save na dispela protes i bin kamap

Em i tok olsem ol i no bin tok save long plen bilong ol long stap long setelmen na protes i go long siti, na ol polis i salim ol lain husat i laik protes i go bek long haus bilong ol.

Planti bilong ol yangpela manmeri husat i laik protes i bin kamap olsem long Bumayong na Bek Rot setelmen we planti ol Morobe lain i save stap.

Em i tok olsem ol i gat wanpela gutpela as tingting long protes, tasol wokabaut bilong ol long givim kot oda em i no bihainim stretpela wei.

"Ol i no bin tokim mipela long plen bilong ol long protes. Ol i no bin raitim pas i kam inap long 7-pela de bipo

long ol i protes, olsem lo i save tok orait long en. Dispela em i rot we ol i bin mekim asua na ol lain i gat pawa long en i tok nogat long kisim dispela kot oda bilong ol," Wagambie i tok.

Ripot i tok olsem ol bikpela bisnis haus na ol haus kago i pas klostu taim bihain long tok win i bin kam olsem ol lain long Morobe i plen long protes i go long Provinsal Gavman haus na givim kot oda bilong ol.

"I no gat wanpela bagarap i bin kamap long ol bikpela haus insait long siti," Wagambie i tok.

Ol i bin tokim ol skul sumatin long go long haus na kam bek gen long taim bung bilong protes i pinis.

Olgeta PMV bas insait long siti i no ran na ol pipel i kisim taim.

Ol lida long Lae olsem Meya bilong Siti, Truly Leahy, Menesa bilong siti, Roy Kamen, na ol narapela memba bilong Provinsal Eksekutiv Kaunsil (PEC) i bin bung bihain long protes i kamap.

Wagambie i tok ol polis i redi long larim dispela protes i ken kamap na Morobe Provinsal Gavman lida wantaim Gavana bilong Morobe, Kasiga Kelly Naru, Memba bilong Lae, Loujaya Kouza, na Provinsal Edministreta, Patalius Gamato, i ken kisim kot oda bilong ol long Sir Ignatius Kilage Stediam.

"Mipela bai lukautim gut olgeta rot i go long siti long olgeta lain husat i protes i ken go insait long hap bilong givim kot oda," Wagambie i tok.

Andrews i toktok strong long ol soldia i bin atekim ol polisman

EKTING Depyuti Polis Komisina na Sif bilong operesens, Jim Andrews, i bin toktok strong long birua pasin ol soldia i bin mekim las wik Fonde long Waigani polis stesen we tupela polisman i bin kisim bikpela bagarap.

I gat 10-pela soldia i no bin werim yunifom na i go long Waigani polis stesen long wanpela toyota len kruisa wantaim rejistresen plet namba, BER 058, na i paitim tupela polisman i stap long wok.

Mista Andrews i bin tok olsem tupela polisman i bin kisim bikpela bagarap long het na ol lek na han bilong tupela, na ol i bin kisim tupela i go long Pot Mosbi Jenerel haus sik.

"Ol soldia i bin belhat bikos ol polis i kisim planti taim liklik long stretim wanpela hevi i bin kamap namel long ol memba bilong tupela fos," Andrews i tok.

Dispela birua i mekim na ol pablik manmeri

husat i bin stap long Waigani maket i kisim ston na tromoi i go insait long polis stesen na i gat planti bagarap i kamap long polis stesen.

Ol i bin salim moa polis i kam tasol ol i kamap bihain long atek na i rausim olgeta maket long hap we pait i bin kamap.

"Konstabuleri i traim long toktok wantaim Nesenel Kepitel Distrik Komisen (NCDC) na painim aut long dispela maket na i laik pasim dispela maket olgeta," Andrews i tok.

Em i bin tok moa olsem dispela pait i kamap bikos i gat narapela birua pasin i bin kamap long tupela wik i go pinis we wanpela soldia i bin dring bia na i no bin mekim stretpela pasin long pablik. Long wankain taim, ol polis i bin paitim em taim em i laik pait bek wantaim ol polis na em i les long kalap long kar taim ol i laik arestim em.

Bihain long dispela

pait i bin kamap, dispela soldia i bin tokim olgeta wanwok bilong em na ol i bin go long Waigani polis stesen na askim ol polis long mekim kompensesen.

Ol i bin wet inap long tupela wik na ol polis i no bin mekim wanpela toktok. Ol soldia i bin go bek gen na paitim tupela polis man.

"Dispela kain pasin nogut i mas no ken kamap long ol disiplineri fos. Dispela kain pasin em i no stretpela wei na mi askim Papua Niugini Difens Fos menesmen long lukluk long dispela problem," Andrews i tok.

"Mipela i mas wok wantaim long stopim dispela kain birua i kamap namel long ol disiplineri fos, pablik, bisnis na ol narapela institusen bilong gavman."

Wanpela stretpela wok painimaut bai kamap long painim aut rot we dispela pasin i bin kamap na tu, ol bai lukluk long ol polis i bin paitim dispela soldia.

Ol nupela polis rikrut was long Madang taun



Nupela singol polis bareks klostu long Mildas na Jomba polis stesin i no redi gut yet.

James G. Kila i raitim

PLANTI ol pablik manmeri long Madang taun i amamas long gutpela wok ol nupela polisman nau i go stap long Madang i wokim, long wokabaut long strit long taun long lukautim lo na oda.

Ol dispela 33-pela yangpela nupela polis rikrut husat i kamaut long Bomana Polis Koles nau i stap long Madang long trening bilong ol, tasol ol i helpim gut stret long stopim planti ol bikhet pasin insait long Madang taun.

Kam long ol dispela yangpela polis-

man meri em i gutpela bikos lo na oda hevi long Madang taun nau i wok long go bikpela tru. Planti stil pasin na planti lain save dring 'paia-wara o yawa' i save soim kain kain bikhet bilong ol long pablik long taun na rurel eria.

Wanpela mama Angela Sotnus, husat i save stap long Nu Taun i tok ol dispela yangpela polisman meri i wokim gutpela wok long rausim ol lain i wokabaut maket na salim stua samting long pablik.

Em i tok ol i helpim long rausim ol strit mangi husat save pikpoket o stilim samting

long ol pablik.

"Gutpela samting mipela i lukim nau em ol dispela yangpela polis man na meri i save wokabaut long lek na wokim wok long strit bilong Madang. Dispela em i gutpela stret," Sotnus i tok.

Sotnus i tok ol pablik manmeri i pilim seif nau long raun long Madang taun.

Long nau yet ol dispela nupela polis lain i save slip long wanpela haus slip long Nu Taun eria long Madang bikos nupela singel bareks bilong ol klostu long Jomba polis stesin i no pinis gut yet bikos pawa saplai i no go insait yet.

Las wik Madang polis stesin komanda, Ben Neneo i tokaut olsem ol lain nupela polis rikrut nau i stap long Fox Nest Lods long Wagol long Nu Taun.

Dispela em bikos kontrakta husat i wokim nupela singol bareks long Jomba i no pinisim wok bilong pulim pawa i go insait long bareks yet.

Dispela nupela singel polis bareks i stap tu long Mildas eria we i gat planti ol bikhet mangi i save raun na simuk mariwana na dring yawa na mekim nabaut. Olsem na polis bareks i stap long rait kona stret.

Ol Morobe i belhat long ol i kukim plak

OL lain long Morobe i laikim wanpela ansa long wanem as ol i kukim plak bilong Morobe Provins long Boundary Rot asde.

Dispela em i wanpela toktok i kamap long kot oda ol lain long Morobe i givim long Gavana bilong Morobe, Kelly Naru, long Tunde na ol i bin mekim lista olsem emi namba wan poin.

"Mipela i laikim ansa bilong dispela. Long wanem as tru ol i kukim plak bilong mipela ol Mo-

robe? Dispela em pasin bilong ol longlong man long strit i kamap na wankain olsem ol i paitm nuspes bilong mipela," wanpela maus man bilong Morobe, Tony James, i tok.

Em i tok Morobe plak em i nuspes bilong olgeta lain long Morobe na em i no stretpela pasin ol i bin mekim.

Gavana bilong Morobe, Kaisiga Kelly Naru, i kisim kot oda na i tok olsem ol i kukim plak em

i bikpela asua na bekim bilong dispela em ol i ken dai.

Lae Suprintenden, Anthony Wagambie, i tok wok painimaut bai stat long dispela asua na ol polis i nidim helpim bilong ol pablik manmeri.

Ol i ripot olsem sam-pela yangpela i bin kukim plak long taim pait i kamap namel long Sialum/Kabwum, Morobe na sampela ol Hailans long Boundary Rot long klostu taim.



Piksa i soim ol Morobe lida i toktok long as tingting bilong kot oda ol i givim long Morobe Provinsa Gavman. Olgeta lain long Morobe i bung wantaim na protes long ol i bin kukim plak bilong ol. Toktok bilong ol olsem ol i kukim plak bilong Morobe Provins i stap namba wan long lista aninit long kot oda ol i bin givim long Morobe Provinsal gavman.



Yut, Meri na Famili
Pastor Barbara Lunge

God i wari long gaden wain bilong em

GOD em i papa bilong gaden wain na olsem em i save wari long em i mas lukautim gut. Ol pipel bilong God long Israel na Sios bilong Jisas Kraus em i gaden wain bilong God. Em i save amamas tru long dispela gaden wain na em i save laik lukautim.

Buk Aisaia i tok long 5:1-2 olsem, "Mi laik singim wanpela song bilong pren bilong mi. Dispela song i stori long gaden wain bilong en. Antap long liklik maunten long hap graun i gat gris pren bilong mi i bin wokim wanpela gaden wain.

Em i bin brukim graun na rausim olgeta ston na planim ol gutpela gutpela han bilong diwai wain. Namel long dispela gaden em i bin wokim haus bilong em i ken i stap na was long gaden. Na long wanpea ples ston em wokim hul olsem tang bilong krungutim na memeim ol pikinini wain.

Olgeta wok i pinis na em i ting olsem, 'Ol diwai wain bilong mi bai i karim gut tru, na ol pikinini wain bai i swit moa yet.' Tasol nogat. Ol diwai i no karim gut, na ol pikinini i liklik tru na i pait long maus."

Dispela em i wanpela song bilong pren bilong em insait long gaden wain. Dispela song em i soim naispela piksa bilong wanpela man i laikim tumas meri bilong em, i soim man i laikim wain gaden bilong en na i stretim wantaim han bilong em yet.

Insait long buk bilong Sefanaia 3:17 tu i tok, "God, Bikpela bilong yupela i stap wantaim yupela. Strong bilong en i helpim yupela na yupela i winim pait.

Bikpela bai i amamas long yupela na mekim song olsem ol manmeri i amamas long bikpela de bilong lotu. Em i laikim yupela tumas, na em i no mekim wanpela tok."

I gat was tawa long gaden na long olgeta hap bilong gaden i gat banis bilong yumi olsem ol Kristen. Yumi mas i stap insait long gaden bilong pasin bilong laikim na bai yumi ken kamapim kain pasin bilong Kraus.

Yumi long olsem em i laik lukim ol gutpela prut tasol nogat ol prut i kamap i nogut na i no swit.

Wara bilong prut em i pait o sawa na ol i strongpela tumas. Oloman, em i wanem kain prut ya!

Em i wok long lukluk tasol long painim stretpela pasin tasol em i lukim ol man i kilim ol yet na blut i kapsait nabaut, na planti hevi na bel krai i stap. Long dispela taim nau BIKPELA God em i laikim yumi mas i stap insait long laikim bilong em long kamapim ol prut bilong kingdom.

Ritim dispela long Galesia 5: 22-Pinis...

Toksav: Sapos yu i gat wari, tingting planti, yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 79638276 o salim email long: lungeb37@gmail.com

Bilum Asosiesen i kisim luksave long gavman

MINISTA bilong Tred Komes na Industri, Richard Maru i tok welkam long dispela tingting bilong Bilum Ekspot Promosen Atoriti (BEPA) long lukim nesanel gavman long helpim na ekspotim ol bilum i go ovasis.

Minista Maru i bung wantaim bos bilong BEPA, Sharlene Gawi, Senia Edvaisa bilong Wimen na Tred Program bilong Intanesenel Tred Senta (ITC), Torek Farhadi na Konsalten na Disaina bilong ITC, Jane Heng long toktok long ol progres bilong ol Bilum Agrimen na ol plen bilong bihain.

Long taim bilong dispela toktok, Mis Gawi i tok tingting bihain long kamapim dispela BEPA em bilong bungim ol nid bilong ol meri long PNG bai ol i ken salim ol bilum bilong ol long ovasis we ol i save mekim na insait long PNG maket.

ITC na SME Kopret i bin helpim BEPA na givim trening



Long raithan, bos bilong BEPA, Sharlene Gawi, Minista bilong Tred Komes na Industri, Richard Maru, Jane Heng bilong ITC na Senia Edvaisa long Wimen na Tred bilong ITC, Torek Farhadi.

long ol meri husat i laik mekim bilum na salim, na tu mekim maket na lainim ol bilum gut long bungim intanesenel standet.

Long wankain taim, Mista Farhadi i bilip long givim

strong long ol meri insait long ol bisnis entaprais olsem salim bilum na ol narapela samting olsem at na kraf.

BEPA bai mekim wanpela proposal long gavman long ol kain sapot ol i nidim long

mekim bisnis long bilum indastri na tu painim ol PNG bisnis meri long kamapim wanpela stua bilong ol bilum insait long Pot Mosbi aninit long 'Stret Pasin Stua' bilong gavman bisnis skim.

Ol meri i lainim ol nupela samting long Ekspo

Esther Bralyn Wani i raitim

OL 7-pela meri i maim Wimen in Bisnis (WIB) i go long Indonesia Tred Fe long stap insait long bikpela bung long las mun i kam bek pinis long kanti.

Tupela komisina bilong ol meri long WIB i go wantaim ol 7-pela meri em Janet Sape na Mary Owala long Motu-Koita Yunien i kisim ol meri i go long lukim ol kain kain bisnis bilong ol pipel long ol Indonesia.

Ol meri i go stap wanpela

wik long Jakata na tripela de ol i stap insait long dispela Ekspo na narapela 4-pela de ol i raun na lukim ol kain kain bisnis long hap. Ol i amamas tru long raun bilong ol na ol i lainim planti nupela samting.

'Ol pipel long hap i no save stap nating, ol save gat wok long mekim olgeta taim. Stua i save stap long fran long haus bilong ol na beksait em ol liklik masin bilong ol long mekim ol prodak bilong ol i save stap,' wanpela bilong ol meri,' Mary Ikirere i tok.

Long wankain taim, Anna Goi i tok, 'Ol i save yusim kain kain samting yumi save ting i no gat wok long em ya kamap olsem wanpela gutpela samting. Ol stik o sel solwara save lusim long nambis ol i save mekim kamap ol narapela kain stail samting.'

'Mipela i amamas tru long dispela Ekspo na raun bilong mipela i kamap gut stret. Long wankain taim mipela i lainim planti nupela samting we i mekim mipela i luksave olsem yumi ken mekim kainkain gut-

pela samting i kamap long ol lip bilong kokanas o skin bilong en olsem dispela kep mi werim,' Misis Goi i tok.

Ol meri i go long dispela ekspo i kisim kain kain stail samting olsem beg, nekles, oil, na planti moa. Ol i kisim kam na salim long ol meri wantok bilong ol long PNG.

Bihain long dispela, City Pharmacy i givim tok orait long ol long yusim hap bilong lusim kar long Sentral Waigani bai ol meri i salim ol kain kain PNG prodak bilong ol long olgeta wiken.

Nupela websait long helpim ol meri long bisnis

Esther Bralyn Wani i raitim

WANPELA nupela websait bai i helpim ol meri long Pasifik i op las wik Fraide long Pot Mosbi taim Minista bilong Foren Afes bilong Australia, Julie Bishop na Westpac Pasifik i opim.

Dispela websait bai gat ol infomesen na ol risos long mekim bisnis. Em gat ol infomesen olsem long rejista wanpela nem bilong kampani, ol rot bilong kamapim wanpela fainensel histori long kisim fainens na ol edvais long

ol isu olsem lukautim pikinini na stretim famili vailens. Ol i ken yusim long ol fon o kompiuta tu.

'Mipela laik lukim namba bilong ol meri i gro bikpela. Dispela em stat tasol long wok bung bilong Wetpac na Dipatmen bilong Foren Afes. Plis yusim dispela websait na tokim planti meri long dispela,' Minista Bishop i tok.

Long wankain taim, Sif Fainensel Kontrola bilong Westpac Pasifik Sondra Courtis i tok, 'Mi save laikim strong na laik pasin long maket i

save stap insait long ol meri long PNG.'

Mis Coutis i tok ol meri i mekim planti wok tasol planti i no gat strong. Em i tok yumi tingting long ikonmik tasol spes bilong fainensel em i tru. Em i tok gavman na ol narapela i mas helpim ol meri long dispela.

Ol meri olsem Dairekta bilong Wimen in Bisnis, Janet Sape na Minista bilong Komyuniti Dvelopmen, Delilah Gore i bin stap insait long taim ol i opim nupela websait.



: Raithan - Lephon: Dairekta bilong Wimen long Bisnis Janet Sape, Australia Minista bilong Fores Afes, Julie Bishop, Minista bilong Komyuniti Dvelopmen, Delilah Gore na KFO bilong Westpac Pasifik Sondro Courtis long taim nupela websait i op.

Bundi Kristen skul wokim gut long dispela yia

EMMANUEL Kristen Akademi Skul long Enekuai rilokesin eria klostu long Kurumbukari nickel main long Bundi LLG long las wik Sarere, i amamas long lukim ol bikman bilong Madang provinsal edministresin i kamap long namba 8 greduesin bilong en.

Dispela Kristen akademi skul i lukim 90 sumatin i kisim pepa long muv i go long narapela level stat long pri skul i go gret 6.

Het-tisa bilong skul, Joe Kapi i amamas tru long tokaut olsem tripela gret 8 sumatin bilong ol bai go mekim gret 9 bilong ol ol sekenderi skul ausait long Madang provins.

“Wanpela sumatin meri bai go long Banz Sekenderi skul long Jiwaka provins, na tupela man sumatin bai go long Mur sekenderi skul long Chimbu provins,” Mista Kapi i tok.

Em i tok stat long 2008 yet i kam, ol i bin salim ol sumatin bilong ol i go long ol gutpela stendet sekenderi skul insait long kantri.

Emmanuel Kristen Akademi skul em wanpela long ol ACE skul we i save givim moa luksave long Kris-



Ol Emmanuel ACE skul sumatin danis long welkam long ol Madang provinsal edministreta na ol lain i go long skul las wik Sarere.

ten pasin na tu i save bihainim sumatin. ACE skul i soim ol yet long pikinini insait long ol skul long kantri Ameriken stail bilong skulim ol kamapim planti ol gutpela save .Mista Kapi i tok stat long 2008,

sampela ol sumatin i pinis long Emmanuel i wokim gut na surik i go moa long Sogeri Nesenel hai skul, Hagen Park Sekenderi, Jiwaka Lutheran hai skul na ol arapela skul.

Planti ol sumatin husat i save go long Emmanuel ACE skul em pikinini bilong ol lain papagraun nau i stap long Enekuai rilokesin eria bilong Ramu NiCo Projek.

“Mipela i kamapim dispela skul bikos lokal komyuniti i nidim gutpela level bilong edukesin. Wok maining bai pinis tumora tasol ol human risos bilong mipela bikpela samting tru. i no long Bundi tasol, em karamapim Madang na PNG tu wantaim,” Mista Kapi i tok.

Madang provinsal edministretan Daniel Alois husat i bin ges spika long dispela taim, i givim tok amamas bilong em i go long skul long helpim em i givim long human risos na i promis olsem edministresin bilong em bai lukluk long sapotim skul

Mista Alois i tok ACE bes edukesin long stail bilong skulim ol sumatin wantaim Kristen pasin em i helpim ol sumatin long gutpela save na gutpela Kristen rot bilong laip.

Alumni i go pas long ol edukesen toktok



Presiden bilong Kokopo Sapta bilong PNGAAA, Lynna Joel i opim tupela de bung long Is Nu Briten provins.

IS Nu Briten (ENB) Sapta bilong Papua Niugini Australia Alumni Asosiesen (PNG AAA) i lukluk long mekim gut edukesen we bai helpim na givim gutpela laip long ol pipel long provins, na surukim kantri i go het.

Tupela de edukesen bung we i bin kamap long Kokopo Australia Awat Smol Grent Program Kokopo i givim K23, 000. Dispela bung em ol PNG AAA Kokopo alumni husat i save tis long provins i bin go pas long en.

Dispela bung i harim olsem edukesen level bilong

ol sumatin long praimer, sekenderi na teseri edukesen i stap daunbilo tru. Dispela i mekim na namba bilong ol gutpela sumatin i no go het long skul insait long provins.

Presiden bilong Kokopo Sapta bilong PNGAAA, Lynna Joel, i tok edukesen em i stat bilong sastenabel developmen bilong ENB na em i mas stat hariap na go inap long yunivesiti level.

“Long luksave olsem ol pikinini bilong mipela long taim ol i stat long lainim nupela samting inap long teseri edukesen i kisim namba wan

na bikpela kwaliti edukesen, i givim gutpela tingting long sosaiti olsem ol i gat save na surukim provins na kantri i go het,” Mis Joel i tok.

Alumni i painim aut ol spes i stap long edukesen polisi we ENB provinsal gavman i ken glasim long apim stendet bilong edukesen long provins.

Dispela edukesen bung i mekim rot bilong luksave long bihain bilong ol edukesen polisi bilong Is Nu Briten wantaim het tok, ‘Our Children Our Futures. East New Britain: Where are we heading in Education?’

Kila Kila i lukim senis insait long longpela taim

Esther Bralyn Wani i raitim

FOREN Afes Minista bilong Australia, Julie Bishop wantaim Gavana bilong Nesenel Kapitol Distrik (NCD) na Minista bilong Spots na Iven, Justin Tkatchenko i opim tripela nupela bilding bilong Kila Kila Praimeri skul long Pot Mosbi.

Dispela i kam aninit long agrimen namel long gavman bilong Australia na PNG long wokim tripela nupela bilding i gat 12-pela klasrum long en.

Memba bilong long stap long hia long dispela wokbung na em i makim 40 yia rilesensip bilong Australia na PNG. Mipela i kamapim strongpela rilesensip antap long rispek na gutpela pasin.’

Minista Tkatchenko i tokim ol sumatin olsem ol dispela samting i bikpela mani long wanem em i laikim ol long lukautim ol klasrum. Em i tok moa olsem ol i laikim olgeta i mas skul.

Long wankain taim, Minista Bishop i tok, ‘Mi amamas

long stap long hia long dispela wokbung na em i makim 40 yia rilesensip bilong Australia na PNG. Mipela i kamapim strongpela rilesensip antap long rispek na gutpela pasin.’

Em i tok ol sumatin long Kila Kila Praimeri na PNG i ken lukim driman bilong ol i kamap tru. Em i tok planti yia i go pinis, ol i bin sapotim ol konstrak-sen long 390 klasrum long 200 skul, long Kila Kila Praimeri em 12-pela nupela klasrum.

‘Ol sumatin i mas stap insait long wanpela envairomen i seif na i gutpela we ol i ken developim pasin bilong gat laik long lainim nupela samting.

Het Masta bilong Kila Kila Praimeri, Philip Sivor i tok, ‘dispela em i narapela kain samting long longpela taim. Dispela ol klasrum i bin stap inap 1949 tasol no gat senis na mi amamas tru olsem nau mipela i gat nupela 12-pela klasrum.’

Mista Sivor i tok ol Gret 4, 5 na 6 bai i yusim nupela bilding.



Het Masta bilong Kila Kila Praimeri skul, Philip Sivor (namel), Minista Bishop na Minista Tkatchenko na Gavana Parkop long sait i sanap fran long nupela klasrum.



**GLASIM
TOK**
wantaim
Fr Lollington Wiam

Seim seks marit na pasin pamuk em i sin

Las wik mi stori long pasin pamuk na seim seks o man man na meri meri i marit. Nau namba tu, hap mi laik stori long pasin pamuk na pasin bilong mani wokimpasin pamuk wantaim narapela man. Long dispela pasin nogut, i gat planti stori long olupela testamen na yumi save God i mekim save long ol dispela pekato manmeri.

Namba wan oda bilong wol God i bagarapim em bikos long dispela kain hambak pasin tasol. Long Buk Stat long sapta 6, i stori long pasin pamuk na kain kain pasin nogut ol man i kamapim na God i lukim i no stret. Na long sapta 7, em i bagarapim olgeta dispela hambak manmeri na em i sevim famili bilong Noah tasol.

Yumi ken glasim olsem taim ol manmeri i kamap planti, ol i gat planti ol gutpela ol pikinini meri na ol man i mekim nabaut na sampela ol Ensel bilong God tu i lukim ol i naispela stret na maritim long laik bilong ol yet.

Taim ol dispela Ensel nogut ol i kamapim pikinini bilong ol, ol i strongpela na mekim kain kain pasin nogut i no gutpela long ai bilong God.

Kain pasin ol i mekim long outsait na insait long hat. Laik pasin bilong ol yet em min olsem, ol i no mekim marit long stretpela rot, nogat.

Ol i pamuk nabaut long laik bilong ol na kamapim planti pikinini we oda bilong wol bilong God i go bagarap olgeta na bikpela pekato i karamapim gutpela wol God i mekim.

Long Stat sapta 6.3 i tok olsem, "Mi bin putim spirit bilong Mi long ol manmeri bilong givim laip long ol. Tasol ol samting bilong graun tasol, ol na mi no ken larim spirit bilong mi i stap long ol oltaim."

Long dispela as God i bagarapim wol long sapta 7 na larim Noah na ol famili tasol i stap, long wanem Noah tasol i stretpela man na i bihainim pasin tru bilong God.

Sapos yumi glasim gut long Buk Stat sapta 1: 26 God i tok, "Nau yumi wokim ol manmeri bai ol i kamap olsem yumi yet," na long sapta 2: 7 God i kisim graun na wokim man long en, na em i givim win bilong laip i go insait long nus bilong man na man i kisim laip. Olsem, laip bilong manmeri i spesel long God na em i laikim sol bilong yumi i mas go bek long em.

Nau yumi kam bek long Nupela Testamen. Taim yumi kisim sakramen bilong Baptisim yumi kisim strong bilong Holy Spirit na bodi bilong yumi i haus holi o tempel bilong God. Em spesel mak o kavanen. Na taim yumi mekim pasin pamuk wantaim arapela man, yumi bagarapim haus holi bilong God na em bikpela pekato.

Yumi go bek long olupela testamen long Buk Stat gen sapta 19: i stori long pasin nogut bilong Sodom na Gomora. Ol hambak man i laik mekim pasin nogut long tupela ensel tu.

Olsem na sapos Gavman i laik tok orait long pasin pamuk na seim marit, orait yumi sios i mas sanap bung wantaim na tok, nogat.

I gutpela sios i mas sanap na tok strong long ol memba bai i ken legisletim lo we bai i mas tok nogat long pasin pamuk na seim seks marit long dispela kantri PNG.

No ken bihainim tingting bilong ol arapela kantri!

Redeemer Lutheran Paris Mekim Spesel Lotu

Ol Lutheran kristen i mas tingim laip na rifom gen

Paulus Tali i raitim.

RIDIMA Lutheran Paris insait long Lae Siti Seket long las wik long namba wan de bilong mun Novemba i bin holim wanpela spesel lotu we ol Kristen tingtim de bilong refomesen.

Pasto Gembubec Wongegec bilong Gutnius dipatmen long Evanselikel Lutheran Sios Bilong Papua Niugini het ofis long Lae i bin autim Tok bilong God na tu mekim aweanes long wok bilong helpim ol sios wokman long taim bilong Refomesen Sande.

Pasto Wongegec i autim tok bilong God bihainim tok bilong

Dokta Martin Luther. Em i tokim ol kristen bilong Ridima Paris olsem yumi kristen oltaim long laip bilong yumi mas rifom gen long kamap gutpela kristen.

Pasto Gembube i bin mekim wankain tok long Boana we ol i bin holim Namba 6 Gutnius Konpren long ples Sibi insait long Sugu Paris.

Ol deliget bin kam long 19 peris na Pasto Gembube i tok olsem tru laip bilong yumi kristen no stret long ai bilong God, tasol sin pasin kamap long yumi oltaim yumi mas tanim bel, refom, long kamap stret na wokabut olsem kristen man meri.

Pasto Wongegec, i autim tok. "Long Lutheran bilip na tiolosi i luksave long pasin bilong yumi stap kalabus manmeri, na yumi yet no inap long kamap fri, na kisim nupela laip, olsem na Kristen bilong Lutheran no ken tubel long bilip ol i gat long Bikpela God na Jisas wanpela tasol.

Long laip bilong yumi tude yumi save beten, singim song, yumi yet Lutheran save lusim sin bilong arapela na kisim Bodi na Blut tru bilong bikpela Jisas" em I tok.

Maski yumi wan wan i bilong arapela sios tasol pasin bilong kristen mas stap long yumi wan wan.

Oltaim yumi mas senis o reform na kamp nupela gen

wokabut olsem trupela kristen. Long buk bilong Rom, 1 ves 16 na 17, "Gutnius em strong bilong God, tru long gutnius tasol yumi kamap pikinini bilong God, na long tok bilong God, yumi em kristen tru long nem bilong Jisas.

Long pinis bilong spesel lotu ol kristen bilong Kote na Hube insait long Ridima, Peris holim spesel ofa long sapotim namba 3 nesene sinod bilong ELCPNG we bai kamap long Helsbach long Kote Distrik.

Ol Kristen i bin kamap gut tru we ol pikinini long Kote Hume Memorial Sios kamapim ol danis na ol kristen insait long Lae Siti i kamap putim ofa.

God i ken yusim ol meri yet long wok evanjelis

Frieda Sila Kana i raitim

JANE Andrew em i wanpela meri tasol namel long olgeta evanjelis bilong Yunaitet Sios bilong PNG husat i bin kamap long wanpela wik konpren long las wik.

Dispela evanjelis i bin stap isi tru namel long olgeta man tasol long taim bilong pinisim konpren long Emmaus Konpren Senta, Don Bosco long Fraide, Modereta bilong Yunaitet Sios long PNG, Rev. Bernard Siai i bin singautim nem bilong em na mekim luksave long em.

Evangelis Jane em i no wanpela skul meri na em i no save long ritim gut baibel na tu long save bilong autim tok. Em i no bin pinisim olgeta skul bilong em long praimer skul na em i no go long wanpela baibel koles. Tasol taim mi toktok wantaim dispela meri, mi kirap nogut long kain save em i gat long wok bilong God na long Tok Inglis tu.

Sotpela stori bilong dispela strongpela wok meri bilong God we i mekim mi kirap nogut em olsem, em i bin harim tru nek bilong God i singautim em taim em i bin slip stap long ples bilong em long Taruruba, Rigo Distrik long Sentral Provins.

Jane i tok em i bilong Yunaitet Sios tasol taim em i save stap long ples bilong man bilong em long Rigo bus i no bin gat Yunaitet Sios long hap tasol i bin gat Salvesen Ami sios wantaim Jehovah Witnes tasol. Olsem na em i save lotu wantaim Salvesen Ami.

Singaut bilong God i bin kam long Septemba 2010 taim em i bin kisim tok orait bilong lokal pasto bilong Salvesen Ami long ples bilong man bilong em long Baligolo ples long em i ken putim siot bilong Salvesen



Evanjelis Jane na man bilong Andrew.

Ami we i gat "S" mak long en.

Em i bin wari liklik long taim dispela singaut i kam bikos man bilong em i no save lotu. Olsem na em i wetim man long kam long pinis bilong wik bikos em i save wok long taun. Olsem na Jane i bin go long ples bilong em yet long Tauruba long nambis bilong Rigo. Tasol taim man bilong em i bin kamap long haus em i bin spak.

"Spirit bilong God i stat long wok bikos mi no bin kros long man bilong mi olsem mi save mekim pastaim. Nogat. Mi amamas tasol na givim kaikai bilong em na taim em i pinis mi askim em long pilai gita na mipela singsing na lotu," Misis Andrew i tok.

Em i tok, bihain long ol i lotu pinis em olgeta famili i go insait long slip long 7 klok nait. Bihain long biknait olsem long 2 klok moning taim em i harim bikpela singaut i kam na kolim nem bilong em na i tok olsem.

"Jane mi bai kisim yu go long ples bilong devil, bikos mi no save bilip long devil. Taim God i tok olsem long mi em seim taim sol bilong mi em Spirit bilong God i litimapim i go antap na bilasim mi long waitpela klos.

Seim taim bodi bilong mi em i slip stap na mi go long ples bilong devil wantaim Bikela," Jane i tok.

Long mekim longpela stori sot, sol bilong Jane i kisim dispela wokabut wantaim Bikpela i go long ples bilong devil, bikpela paia na em i lukim ol famili bilong em husat i stap laip yet insait long ples bilong devil. Olsem na taim em i kirap long slip em i krai na tok sori long ol sin bilong em na i pulap long pawa bilong Holi Spirit.

God i tok moa long em na i singautim em go aut long ples bilong em bilong wanem God i makim sampela ples na ol pipel long graun we em i mas go na tokim ol long gutnius bilong God i kisim bek ol. Nau wantaim pret bilong God, man bilong em Andrew i lusim wok mani na tupela wantaim mekim wok evanjelis raun long eria bilong Papua we i gat rot kar tasol. Em i gat planti hap bilong Papua Niugini na ol narapela kantri we God i kolim nem bilong ol long em i mas go tasol em i no gat mani na em i no save wanem rot em bai go.

"Ministri bilong mi em God i tokim mi long kolim nem, "Divine" Jane i tok.

Sampela ol hap we God i

tokim em klia long go na bringim gutnius em Mt Tavurvur long Is Nu Briten, Shangara na Barak ples long Popondetta, Buraden, Kaiapit na Nadzab long Morobe, Kieta long Bogenvil, na tupela o tripela famili long Kimbe, Wes Nu Briten.

Long ovasis em i gat singaut long go long Tahiti, Tonga Nukualofa, Nu Silan, Sri Lanka, Colombia, Cairns na Brisbane long Australia. Em i gat strongpela bilip olsem long yia bihain, bai God i opim rot bilong em long stat long go long ol dispela ples.

Nau Jane i laik long holim wanpela kruseid long Pot Mosbi siti long Jack Pidik Pak o long Sir John Guise Stadium sapos em i ken kisim sampela fainenesel sapot.

"Mi ken mekim olgeta kain kruseid long hia tasol sapos mi no go long ol ples we God i tokim mi long go, mi pret no gut bai em i rausim mi long taim mi go kamap long dua bilong heaven," Evangelis Jane i tok.

Jane em i amamas tru long Asembli opis bilong Yunaitet Sios bilong PNG i singautim em long stap long dispela enuel konpresn bilong ol evanjelis long lainim planti samting.

Em i lainim olsem em i mas kamapim pasin bilong ritim na stadi long baibel bikos nau em i save wetim God tasol long givim tok long em na em i save autim.

Evangelis Jane Andrew i gat 37 krismas na em wantaim man bilong em i gat 5-pela pikinini. Nau yet olgeta i save raun mekim wok evanjelis long wanem hap Jane i harim singaut bilong God long en.

Divine Ministri nau i stap 5-pela yia long wok misin.

Ekseminesen em i mak bilong skelim save



Edukesen Dipatmen i tokaut nau olsem bai i no gat moa Gret 8 na 10 eksem bilong ol pikinini long ol komyuniti na haikul. Dispela yia em i las taim bilong ol pikinini long wokim ol dispela eksem. I gat toktok i kamap olsem long 2016 bai i no gat eksem i kamap, bai ol tisa i givim mak long skul wok bilong ol pikinini tasol.

Ol papaman husat i harim dispela nius bai i gat tupela tingting. Sampela bai amamas bikos ol i save wari long taim bilong eksem. Ol i ting sapos pikinini i no kisim gutpela mak, bai em i feil na i no gat sans long stap moa long skul.

Tasol i gat sampela papamama husat i no wanbel long harim dispela nius. Ol i laik lukim ol pikinini i sindaun long ekseminesen bikos dispela em i namba wan rot bilong skelim save bilong ol pikinini. Risal bilong ol bai soim ples klia sapos pikinini i smat long skul wok o nogat. Na bai soim ples klia tu sapos ol tisa i mekim gut wok long skulim ol pikinini o nogat.

Tude long kantri, yumi lukim stended bilong edukesen i drop i go daun olgeta. Ol tisa i slek long wok, o ol i no gat pepa bilong mekim wok tisa. Sampela skul i no save givim ripot kad long wan wan tem olsem na papamama i no save sapos pikinini i lainim gut ol samting o nogat. I no gat tisa inspeksen i kamap long lukim sapos tisa i skulim gut ol pikinini o nogat. Olsem na sapos i no gat ekseminesen, bai kru bilong ol pikinini i



Jada 0151

malolo na i no inap smat long lainim ol samting.

Ating sampela tisa bai malolo gut long skulim ol pikinini. Ol i

save olsem i no gat eksem na watpo bai ol i brukim het long putim save i go insait long het bilong ol pikinini. Yumi lukim olsem

bilong kantri olsem dispela stil pasin i kamap. Long ol arapela yia i go pinis, wankain ripot i kamap long sampela skul i mekim kain

kwaliti bilong tisa na risal bilong ol eksem i wok long pundaun. PNG i winim 40 yia nau, tasol kwaliti bilong edukesen i feil, em i wok long pundaun i go daun. Ating bihain long narapela 40 yia, bai yumi kamapim ol sitisen husat i no inap long yusim het bilong ol yet long wokim ol samting. Bai ol i sindaun olsem ol longlong na larim ol arapela lain i go pas long olgeta samting.

Orait long wankain taim tu, i bin gat ol ripot i kamap pinis olsem sampela lain i wok long salim ansa bilong ol eksam pepa long ol pikinini. I gat ripot i kam long olgeta hap

pasin olsem. Sapos ol dispela ripot i tru, bai i yumi mekim wanem? Em i wok bilong husat long was na stapim dispela kain stil pasin i kamap?

Nau em i taim bilong yusim ol kompiuta na i isi tru long ol lain i ken stilim ol samting sapos i no gat gutpela sistem long protektim data. Ol stilman i smat moa long yusim liklik save bilong ol long IT na mekim kain wok olsem.

Dispela pasin i bin kamap bipo na sapos em i kamap gen, orait em i soim tu olsem seksen bilong Dipatmen bilong Edukesen husat i mekim wok bilong lukautim ol eksem pepa i no gat gutpela proteksen. I mas gat wok bilong painimaut i kamap na putim gut was long sistem bilong stopim kain stil pasin olsem i kamap long bihain taim. Painimaut long ol arapela kantri wanem kain rot ol i yusim na kamapim strongpela banis long was long ol eksem pepa.

Yumi mas mekim olsem nau long helpim sindaun bilong ol pikinini bilong yumi long bihain taim. Kantri bilong yumi i nidim ol gutpela manmeri husat i ken yusim save bilong ol long mekim ol wok. Olsem na em i wok bilong yumi ol papamama bilong tude long helpim ol pikinini bilong yumi. Yumi no inap baim save, maski sapos yumi tromoi nating bikpela moa mani long fri edukesen. Save bilong ol pipel em i namba wan mak long soim sapos yumi winim tru developmen o nogat.

Ol memba mas mekim wok

GUTPELA gavman bai amamas taim em i lukim ol manmeri bilong em i gat gutpela save, gutpela skul, gutpela helt, gutpela rot, gutpela wara, pawa, rot bilong salim tok i go i kam na inap long mekim wok bisnis.

Gavman nogut bai i no inap long tingting long wanem kain sindaun ol manmeri bilong em i gat long em.

Long dispela as sapos manmeri i mas gat gutpela sindaun, yumi tok wok i stap long han bilong ol manmeri mipela makim long go long palamen, provinsal asembli o long wod kaunsil.

Ol i mas mekim wok long ol provins, distrik na wod level bilong ol bai manmeri i gat gutpela sindaun.

Sapos ol i no mekim wok na i stap nating o tingting long ol yet, bai no gat gutpela senis na sindaun bai



kamap long ol manmeri.

Long 2016 Mani Plen gavman i makim K4.22 bilien o 26 pesen bilong nesenel baset i go long ol provins.

Dispela mani mak i winim mani mak gavman i makim long ol arapela hap o wok.

Long dispela mani K890 i go long ol distrik aninit long distrik sevises impruvmen program (DSIP), K220 milien long wan wan provinsal

gavman aninit long provinsal sevises impruvmen program (PSIP) na K31.4 milien long ol wod kaunsil

eria aninit long lokol level gavman sevises impruvmen program (LLGSIP). Moa long dispela, gavman i makim K55.5 milien olsem distrik sapot gren (DSG) na K13.3 milien olsem spesel sapot gren (SSG). Antap long olgeta dispela gavman i makim K554 milien long guds na sevises takis (GST) na bukmeka long go long wan wan ol provins.

Long dispela em i tru olsem gavman i makim bikpela mani i go long ol provins.

I no nau tasol gavman i givim kain mani olsem, nogat.

Gavman i wok long givim ol bikpela mani olsem K4 milien long ol distrik aninit long DSIP stat long 2007. Dispela mani mak nau i go antap long K15 milien.

I no DSIP tasol em i kamapim tu PSIP na LLGSIP na i wok long givim mani long dispela ol pro-

gram.

Long dispela as mipela i ken tok ol wod level, distrik na provins i wok long kisim planti mani.

Sapos ol memba i wok em i tru ol ples na ol manmeri bai lukim bikpela senis na gat gutpela sindaun.

Wanwan memba mipela i wok long harim ol gutpela nius i kamap long ol i gat gutpela ol haus sik, helt senta na etpos. Senis long ol skul bilong ol, ol pikinini inap go long skul na i gat gutpela klasrum, ol manmeri i gat gutpela rot, wara, pawa na inap mekim wok bisnis.

Planti mipela wok long harim yet manmeri long ples na distrik bilong ol i wok long kros yet long ol i no gat dispela ol gutpela sevis na sindaun.

Wok nau i stap long han bilong ol memba long ol i mas kamapim ol wok long ples, distrik na provins long gutpela senis i kamap.



Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager

Elizabeth Konga

Editor

Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Inus rotblok kamapim hai level midieisen

Stori na piksa Eleanor Maineke i raitim

BOGENVIL i wok long stap long rot i go long Referendum olsem na long dispela taim olgeta lain i wok long putim ai long dispela liklik ailan bikos nau em i wok long redi long go insait long taim we ol pipel bilong em bai i vot long Referendum.

Long de namba 6 bilong mun Novemba i bin gat wanpela bikpela hai level kibung i bin kamap long Waropa ples insait long Tinputz distrik long Not Bogenvil.

Dispela kibung em i wanpela hai level mediesen bihainim rotblok i stap long dispela hap. Dispela rot blok em i kamap bihainim wanpela pait i bin kamap namel long ol lain bilong tupela bisnis man. Wanpela bilong Kieta distrik na narapela bilong Tinputz.

Dispela tu i kamapim narapela hevi we ol lain bilong dispela bisnis man bilong Kieta i kisim kar bilong pikinini bilong bisnis man bi-

long Tinputz. Olgeta dispela hevi i kirapim bel hevi bilong ol lain bilong Not Bogenvil moa long ol Tinputz na Suir, we i save gat long dispela bikpela hevi bilong krais.


Dispela hai level midiesen em ol memba bilong Atonomas Bogenvil Gavman (ABG) tu i bin stap long harim, skelim na stretim toktok namel long ol tupela lain i gat bel hevi.

Inap olsem 7-pela memba bilong ABG i bin stap na insait long dispela kibung. Tupela Minista, em Minista bilong Polis, Willie Masiu na Minista bilong Praimari Indastri, Nicholas Daku.

Dispela kibung i bin lukim moa long 300 man na meri husat i bin kam long Suir, Panguna, na Kieta.

Dokta Naihuwo Ahai, em i edvaisa long Bogenvil Pis Bilding Program (BPBP) i bin stap olsem namel man midieta long dispela kibung.

Dispela hevi nau i stap long han bilong ABG we ol i bin putim wanpela petisen long gavman bai i helpim ol.



Dr. Ahai toktok olsem namel man long dispela kibung.



Ol Manmeri i bin kamap long dispela kibung.



Ol i bin digim rot na putim rotblok long dispela hap rot.



Ol lida Manmeri i sindaun harim na skelim ol stori bilong dispela hevi.

Rasia stopim ol balus i go long Ijip

RASIA i tok em i kisim 11,000 ol turis long Ijip i go bek long Rasia na bai em i kisim sampela moa i go bek long Sande. Rasia i stat long rausim ol pipel bilong en husat i go raun olsem ol turis long Ijip bihain long wampela bikipela birua i kamap long Oktoba 31, we wampela balus bilong Rasia, Metrojet Flait 9268 i pairap long skai na pundaun i kam daun long graun long Sainai. Dispela balus i bin karim 224 man-meri we planti bilong ol i bin ol turis bilong Rasia husat i go holide long Ijip.

Gavman bilong Rasia i tokaut nau olsem ol balus bilong en bai i no inap flai i go long Ijip. I bin gat sampela ripot i kamap pinis we i tok wampela bom i bin pairap long balus na kamapim dispela birua.

Wampela spesel lotu i bin kamap long St Petersburg, biksiti bilong Rasia, long tingim ol dispela 224 pipel husat i dai long dispela birua. Na long noten siti bilong St Isaac Katedrel, belo i bin pairap inap 224 taim olgeta

long tingim wan wan bilong ol lain i dai.

Long wankain taim tu, namba foa balus i karim bodi bilong ol lain husat i dai long dispela bagarap i go bek long Pulkovi ples balus we ol saveman i wok long painimaut nem bilong ol dispela pasindia. Ingran i helpim long karim ol 3,500 pipel long Sharm el-Sheikh ples balus long Ijip we Metrojet Flait 9268 i wok long flai i go long St Petersburg long taim em i bungim dispela hevi.

Ingran tu i stopim ol balus bilong en long flai i go long Sharm el-Sheikh bihain long ol i kisim ripot olsem wampela bom i bin daunim dispela balus bilong Rasia. Rasia i no bin wanbel long taim ol i harim dispela, tasol bihain ol tu i stopim ol balus bilong Rasia long flai i go long Ijip. Long las wik Sande, Presiden Vladimir Putin i sainim tokorait long stopim olgeta balus bilong Rasia long flai i go long Ijip.

Olgeta yia, planti milien turis bilong Rasia i save go holide long Sharm el-Sheikh na Hurghada long Ijip. Long

2014, samting olsem 3 milien turis bilong Rasia i bin go stap long ol holide risot long Ijip. Ol gavman opisa i tok long taim Rasia i tokaut long stopim ol balus bilong em i flai i go long Ijip, i bin gat samting olsem 80,000 turis bilong Rasia i bin holide i stap long Ijip.

Sapos i tru olsem wampela bom i bin daunim dispela balus bilong Rasia, bai Rasia i tingting gen long plen bilong en long joinim ol arapela kantri long stopim ol trabel i wok long kamap nau long kantri Syria.

Wampela memba bilong Ijip husat i stap long intenesel tim i wok long sekap nau long dispela birua i tok, ol i gat strongpela bilip olsem wampela bom i pairap insait long balus na kamapim dispela hevi. Em i tok nois ol i harim insait long vois rekoda bilong kokpit bilong balus i olsem nois bilong bom i pairap. Tasol long Sarere, man i go pas long dispela tim, Ayman al-Muqaddam, i tok ol i no inap tokaut hariap sapos wampela bom i bin kamapim dispela hevi.



Tupela dem i bruk long Brasil na kilim ol pipel



GAVMAN bilong Brasil i no ting ol bai painim ol 26 pipel husat i bin lus long taim tupela dem i save holim pipia wara bilong ain ore main, i bin bruk na graun wantaim ol weist wara i karamapim ples. Dispela birua i kamap long wampela ples ol i kolim Bento Rodrigues. Gavman i tok ol i painim bodi bilong wampela man tasol i no gat sain bilong ol arapela 26. Moa long 500 pipel i save stap long Bento Rodrigues.

Gavana Fernando Pimentel bilong Minas Gerais i tok i luk olsem bai ol i no inap painim ol dispela lain.

Ol dispela tupela ain ore main i bilong Vale na BHP na Samarco i opereta bilong en. Man i go pas long Vale, Ricardo Vescovi, i tokim AFP nius ejensi olsem lo bilong Brasil i no tok ol i mas putim alam sistem long tok save long taim bagarap i kamap long wampela dem. Em i tok gavman i bin givim tok orait long imejensi rispons plen bilong ol.

Long taim ol dispela tupela dem i bruk, retpela graun wantaim poisin graun malmalum i bin kapsait i kam daun na karamapim ol haus, ka na trak. Tait i karim ol dispela graun i go long ples i

stap 70 kilomita longwe long dispela tupela dem. Ol pipel i pret dispela posin graun bai kamapim kain kain sik na bagarap.

Opereta bilong dispela main, Samarco i tok ol i no gat infomesen bilong kain birua olsem, wampela mausman bilong kampani i bin tokim Reuters nius ejensi.

Ol opisa bilong gavman i no tokaut sapos namba tri dem long dispela hap bai bungim wankain hevi tu o nogat. Na ol i mekim yet wok painim aut long luksave sapos sampela liklik guria long dispela eria long Fonde i bin kamapim dispela birua.

Pait kamap long Krismas Ailan Ditensen Senta



GAVMAN bilong Australia i tok i gat sampela 'distebens' i kamap long Krismas Ailan ditensen senta. Ol trabel i stat long Mande bihain long ol i painim bodi bilong wampela man husat i bin ranawe long dispela ditensen senta. Dispela man nem bilong em Fazel Chegeni na em i bilong Iran. Wampela man husat i stap insait long senta i tokim televisen bilong Nu Silan, TVNZ, olsem ol gad i lusim dispela senta bihain long ol pait i kamapim.

Gavman bilong Australia i tok i gat ripot bilong ol lain i kamap bagarap long ol samting insait long senta. Moa polis bilong Australia i kamap long dispela senta long Tunde long stopim dispela hevi.

ailam sika i go long Kismas Ailan i stap 2,650 kilomita longwe long Perth na 380 kilomita saut long Java, Indonesia. Ol i save salim sampela bilong ol asailam sika i kam long Manus long Papua Niugini na long Nauru Ailan.

Krismas Ailan ditensen i gat ol Nu Silan em gavman bilong Australia i rausim ol. Namba bilong ol i kamap bikipela bikos Australia i wok long kenselim visa bilong ol Nu Silan husat i mekim kriminal pasin.

Ol ripot i tok Fazel i bin ranawe long dispela senta long Sarere na ol i painim bodi bilong em long Sande. Ol i wok long mekim ol wok painim aut nau long indai bilong em.

Action Coalition Grup i tok, Fazel i wok long wari long longpela taim tru em i stap long ditensen senta. Em i tokim ol arapela lain olsem em i les long stap long ditensen na i laik go autsait.

Gavman bilong Australia i tok ol kriminal geng i wok long kontrolim ol asailam sika na em i wok bilong gavman long stopim. Tasol ol arapela lain i tok gavman bilong Australia i no laik ol lain olsem i long Australia olsem na i kalabusim ol long ol ditensen senta. Ol lain bilong Human Rights Watch long Australia i tok dispela pasin bilong putim ol lain long ditensen senta longpela taim tru em i wampela disasta. Ol i wari tu long sindaun bilong ol lain i stap long ditensen senta long Manus.

Sierra Leon i amamas long sik ebola i pinis nau

OL pipel long biktaun bilong Sierra Leon i amamas na laitim ol kendel long makim tok save olsem sik ebola i pinis nau long kantri bilong ol. Long taim dispela sik i bin stat las yia, sik i bin kilim moa long 4,000 pipel, namel long ol em 220 helt woka.

Bihain long 42 de we i no gat wampela nupela ripot bilong sik i kamap, gavman i tokaut olsem dispela sik nogut i stop nau. Wampela seremoni i bin kamap long Sarere we Presiden Ernest Bai Koroma na mausman bilong UN Wol Helt Ogrenaisesen, (WHO) Anders Nordstrom i bin stap insait long en. Planti tausen

pipel i bin kamap long dispela bikipela bung aninit long wampela bikipela diwai long Freetown na laitim kendel long tingim ol lain helt woka husat i dai long taim ol i wok long lukautim ol sikman.

"Ol i dai, bai yumi ken stap laip," wampela yunivesiti studen i tok. Planti bilong ol dispela helt woka i dai bikos ol i no gat ol ol samting olsem glap na ol samting bilong lukautim skin bilong ol, na tu, ol i no bin kisim trening long stretpela pasin bilong luakutim ol sikman.

Namba wan meri husat i bin kisim sik ebola na i stap laip, Victoria Yillia i tok em i

amamas dispela sik klostu i kilim em i pinis nau.

Ebola i kilim moa long 11,300 pipel long Sierra Leon, Liberia na Guinea long taim sik i kamap bikipela tru long Mas 2014 na moa long 28,500 i kisim dispela sik. Liberia i tokaut long Septemba 3 olsem dispela sik i pinis long kantri bilong ol. Na long Guinea, wan wan pipel i gat dispela sik yet.

Wol Helt Ogrenaisesen (WHO) bai i wok bung wantaim gavman bilong Sierra Leon long stopim dispela sik na helpim gavman long strongim gut helt sistem bilong kantri.

Mangi Buka i winim Vocal Fusion

Stori bilong tumbuna

Snek maritim yangpela meri

LONG wanpela taim, long wanpela viles ol i kolim Wop-kona, ol yangpela meri i pasim tok long go long bikbus long painim ol rop bilong wokim bilum na mat na painim ol abus tu.

San go daun na ol i go bek long ples. Namel long mak bilong bus na ples, wanpela naispela naispela Kum Kate meri i bos bilong ol i tokim ol, yumi lukim pastaim wanem samting yumi kisim na go long haus olgeta i lukim pinis, las tru em yet i tok, mi kisim kiau bilong Muruk. Em laik kisim na soim ol ya nogat, traipela mama bilong snek i slip long blium bilong em.

Olgeta meri i lukim na ol i pret nogut, kirap singaut, lusim olgeta samting na ranawe go tasol snek i wok long bihainim ol. Ol meri kisim stik na ston na paitim em tasol em i wok long bihainim yet, go inap long viles bilong ol na go nabaut long haus bilong ol. Snek bihainim dispela yangpela meri i kisim em na go long haus bilong em na go slip long varenda bilong haus.

Papa na mama i laik katim em long tamiok tasol yangpela meri i tok nogat, larim em stap na yumi lukim em mekim wanem? Orait nau wanpela wik i pinis, na papa-mama na ol lain i askim snek, "Sapos yu wanpela man i mekim stap orait mipela laik givim yu planti pik na kina long yu."

Snek i tanim het na tok nogat. Ol i askim gen, yu laikim wanem samting, yangpela meri ya? Snek i daunim het na tok yes. Orait long moning ol kirap na kilim traipela pik, bilasim yangpela meri na putim bilum pik long het bilong meri na tokim snek, sapos yu man orait, go pas na kisim meri go long haus bilong yu.

Snek ya stretim olgeta bodi na go pas long rot na tupela go long bus rot ol i kam long en. Long mak bilong bus na ples, snek i makim long het na tokim meri, yu stap long hia, mi go long bus. Longpela taim liklik nau wanpela naispela yangpela man i kam aut, meri kirap nogut na tok, yu husat.

Man i tok, em mi tasol kisim yu kam, lukim skin bilong mi yupela paitim mi long hia. Givim ol kaikai bilong mi na mi kaikai wanpela pik, mi no kaikai na mi hangre tru. Meri ya kirap holim pasim em na kra i wantaim na tok, olsem wanem na yu no kam olsem, na mi na ol lain bilong mi amamas na mitupela kam.

Man kaikai pinis na tupela laik tanim long wokabaut ya nogat, tupela sanap pinis long wanpela gutpela ples, gutpela gras, plaua gaden na haus kapa, ol kain kain kaikai i pulap stret. Meri i amamas moa na laikim tru man bilong em, kisim ol fri kaikai na stap go na karim planti pikinini na tupela i stap.

Nau ol dispela lain ol i kolim ol lain tumbuna bilong ol ENGA. Stat long Enga long Baiyer Riva na go antap long Enga, nau yumi kolim Enga Provins bilong PNG.

**Peanga Sai
Enga Baiyer WHP
Mt Hagen**

TOKSAVE:

WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C-Word Publishing Company, P O Box 1982, BOROKO, NCD, PNG o email edres: editorial@wantok.com.pg Telepon namba: 3252500.*

Tenkyu



CEO bilong EMTV i givim tropi long wina, Morris Opeti.



Ol tripela wina, Nimrod Nadile i kam namba tu, Morris Opeti i kamap namba wan na Steven Ilave.



Wina bilong Vocal Fusion, Morris i kisim prais mani na tropi.



Sif Eksekutiv Opisa (CEO) bilong EMTV, Bhanu Sud wantaim 4-pela kontesten.

Esther Bralyn Wani i raitim

VOCAL Fusion long EM TV i lukim 'Battle of 2 Seasons' long Sande nait long Pot Mosbi taim 4-pela kontesten i resis long winim wanpela tropi wantaim K100, 000.

Dispela i lukim 4-pela kontesten husat i bin resis long singsing i stap yet long kamap namba wan. Steven Ilave, Jeremiah Prout bilong Milen Be, Nimrod Nadile na Morris Opeti bilong Buka i resis long singsing.

Ol jas husat i bin stap long dispela gren fainel em, Graham Osborne, Elly Web, Jagarizza na Kong Kara o Nicholas Arson Murray bilong Jamaica.

Ol 4-pela kontesten i singim namba wan song bilong ol em Dairekta bilong Vocal Fusion, Patricia Popei i makim we ol i kolim produsa sois.

Tasol, Morris Opeti bilong Buka i winim dispela gren fainel wantaim tropi na K100, 000. Em i singim song bilong Eric Carmen, Hungry Eyes na i pinisim tru nek bilong Eric we i winim tingting bilong ol jas na ol pipel tu.

Nimrod Nadile i kamap namba tu i winim wanpela tropi wantaim K20, 000.

Morris i bin lukim laip i hat na em i tingting long go bek long ples tasol em i strong na i go het long resis long singsing.

"Mi laik tok tenkyu long olgeta sapota bilong mi, olgeta pipel long Atonomos Rijon bilong Bogenvil (AROB) na ol NGI long sapot bilong yupela," Morris i tok.

Long wankain taim, jas Graham Osborne i tok, "Long wanpela bruk nait klap bilong Buka em i kamap wanpela gutpela singa tru wantaim naispela nek."


Ol sponsa i bin sapotim dispela Vocal Fusion em; Coca Cola, Telikom PNG, NID projek, Origin Energy, Colgate Palmolive, Bargain Box na sampela moa.

Vocal Fusion bai i kamap gen long Februeri long neks yia.



Nupela jas bilong Jamaica, Nicholas, i singim wanpela singsing bilong em.

Em nau! Ol pikinini i ken painim rot i go long ples wantaim Wantok kru...



Pepsi Fan Ran

Kanage bilong Madang em i stap i go na sisen bilong Pepsi Fan Ran i kamap. na em i hariap tru go baim wanpela tiset bilong em na em i wok long trening i stap.

Taim bilong fan ran i kam na Kanage i stap pinis. Bik moning tru na ol bosman i tokim ol rana olsem long ol i mas raunim taun na olgeta i tok yesa tasol. Na ol i tokim ol olsem husat man i win pas bai i go long ples bilong ol waitman na Kanage i amamas nogut tru na em i tok sans yah.

Bosman i blowim wisel na ol stat ran. Olgeta i bihainim stretpela rot tasol Kanage i laik go lukim ples bilong waitman na em i wok long katim long mekim sot kat na painim hariap pinis lain. Taim em i kamap long pinis lain, ol man meri i singaut na amamas long wanem em i ting em i kam pes na em i amamas nogut tru olsem em bai go lukim ples bilong ol waitman.

Tasol em i no save olsem ol i lukim em pinis na ol i no mekim wanpela tok.

Taim bilong kisim prais na ol bosman i singautim narapela man long go na kisim prais bilong en. Kanage i belhat nogut tru na go antap na kros wantaim ol man i go het long resis. Tasol em i no save olsem, maikrofon i on na olgeta manmeri i harim wanem samting em i wok long kros long en. Bosman i tokim Kanage olsem em i no bihainim rot bilong ran. Em i katim long sait long kamap pes man tasol em i kam las. Man taim olgeta man i harim dispela ol i lap na Kanage i sem nogut stret na ranawe go waswas wantaim ol mangi long nam-bis.

De bilong tingim ol soldia long woa

De bilong tingim ol soldia long woa. I no tulait gut yet na Kanage i stat long krai. Em i tingim ol tumbuna bilong em ol Siapan (Japan) i kilim.



Taim meri bilong em i harim Kanage i krai meri i askim Kanage lewa long wanem samting stret na em i wok long krai.

Em askim em olsem, "Yu hangre o yu tingim ol yangpela taim bilong yumi bung long as bilong mango na pasim tok long marit."

Dispela i mekim Kanage i singaut nogut tru na krai, "O papa bilong mi, husat i kilim yu ol Siapan o yumi Niugini Papua yet. Netpi kaikai Netpi na kanaka kaikai kanaka"

Taim meri i harim olsem em i lap i dai nogut tru na apsait ai bilong em i kam aut.

Jamex Angoram, Is Sipik.




Ol wod lista hia:

- AMAS
- APLIKESAN
- ANTAP
- BAMIM
- BELO
- BETEN
- BINEN
- DIMDIM
- DOKTABOI
- DRAMIM
- GRAUN
- GUTWOK
- HAUSMERI
- HELPIM
- INDESTRIS
- IKWAL
- KAPIAK
- KAUKAU
- KIRAPIM
- KUSKUS
- LAIPTOK
- LITIMAP
- MAMA
- MARIT
- MINING

Y P N C M E O F R M J A S H I U K E V L
 A S G R T E A T D O A U N T M M E S E F
 L S H E U F R B I N E N O T Z A U U R E
 S N O Y N O N M M V U N T E T K S D C A
 S U M C R V E I A A L N D A S I S H O D
 N L M U S D S I R M A U K U P L T J M E
 B R I X E M G G B A A M K U D B E C K D
 N B I Z O H L T M K N O A E E C E M B H
 S A J A D H H I U E W M V S I K W A L Y
 O T P L I Q P A T T I N A M A W R L R H
 M G U S R L K E U I E B I I E L M A E T
 W O U E E S B G O S M D P S T I A X I E
 R O S H M D L B E E M A T O M G R X A I
 E N G B Q P A K H I K E P A N S I E P M
 J T I E A T I N D E S T R I S K T I E E
 K H G L K L P K B H E D N I I C S G M D
 L S T O P C S F V A T I C J S P E E E P
 S A D A A E T E E U M V Q P C R E N G M
 D O B F E Z O L O E R I P I Q D S S B N
 L P T O N P K I R A P I M E M O T H E A

Ansa bilong Wod Pilai isu 2147



Bod i pasim tok long salim Tolukuma

PETROMIN PNG Holdings i bin wokbung wantaim Sentral Provinsal gavman long salim Tolukuma gol main.

Dispela em i toktok i kam long siaman bilong Petromin Sir Brown Bai. Sir Brown i mekim dispela toktok long kliam tingting bilong ol papagraun na sampela lida bilong Sentral Provins.

Sir Brown i tok disisen bilong salim Tolukuma gol main i no bin kam long maus bilong wanpela o tupela man tasol.

“Ol bod ov dairekta bilong Petromin na Tolukuma gol maining i bin sindaun long maining na kamapim dispela disisen. Na mipela i bin tok-tok wantaim ol mausman bilong Sentral provins tu wantaim,” Sir Brown i tok.

Las wik Memba bilong Kairuku-Hiri Peter Isoaimo na Sentral Gavana Kila Haoda i bin askim Maining Minista Byron Chan long tokaut long dispela tekova bilong Tolukuma.

Tasol Minista Chan i tok em i no save wanem samting i kamap long Tolukuma. Dispela i mekim na ol memba i paul long wanem as tru Petromin i bin salim dispela namel sais gol main.

Sir Brown i tok ol senia menesmen tim bilong Petromin i bin wokbung wantaim ol opisal bilong Sentral Provinsal gavman taim ol i wok long painim ol baia long salim dispela main.

“Mipela i bin wok wantaim Sentral Provinsal gavman. Mipela i gat ol evidens long soim olsem mipela i bin sindaun long ol miting na bungim ol tingting long salim dispela main na larim wanpela kampani bilong Sinagapo i baim,” Sir Brown i tok.

Petromin i bin sainim wanpela agrimen long salim Tolukuma gol main i go long wanpela kampani bilong Sinagapo ol i kolim Asidokona Maining Risoses PTE.

“Asidokona em i wanpela kampani we i gat wok na ol i rejistaim long Sinagapo. Mama kampani bilong en i UOBKayHian. Dispela kampani i wanbel long mekim nupela rot long joinim Tolukuma na Hiritano Haiwe.

“Em i wanbel long larim ol papagraun wantaim Sentral Provinsal gavman i kisim 10 pesen fri keru ekwiti,” Sir Brown i tok.

Dispela tupela samting em strongim tingting bilong Petromin wantaim Sentral Provinsal gavman long larim

Asidokona i baim Tolukuma.

Tasol Gavana Haoda i tok em i no save long wanpela samting long sait bilong tok-tok ol i mekim wantaim Petromin long salim dispela main.

Mista Haoda i tokim Palamen las wik olsem Petromin inap long tok save long em na Sentral Provinsal gavman na ol lida bilong provins tasol dispela i no bin kamap.

Tolukuma Gol Main i stap long Goilala distrik na Petromin i bin lukautim dispela gol main tasol bihain long nius i kamaut ples klia olsem Petromin bai salim dispela main, wanpela biknem papagraun i tok ol pipel i no wanbel long dispela nupela kampani i tekova long main.

Siaman bilong Auga-Dilava Risos Asosiesen Billy Aia i tok ol papagraun i no wanbel long dispela nupela kampani bikos Petromin i bin no bin tok save gut long ol lenona na papagraun olsem Asidokona bai kam insait na tekova long maining operesen long Tolukuma.

Auga-Dilava Risos Asosiesen i makim maus bilong ol papagraun bilong Tolukuma husat em ol Goilala, Kuni na Mekeo manmeri.

Risos sekta i kirapim teknologi bisnis

MAINING, ges na wel indastri long PNG i wok long kirapim planti sans bilong ol manmeri PNG yet long i go insait long teknologi bisnis.

Nupela teknologi na sofwe i wok long helpim ol man i mekim wok isi na sevim moa taim. Long maining na petroleum indastri, teknologi na kompiuta sofwe em tupela namba wan samting we ol kampani i wok long yusim long mekim hatpela wok i kamap isi.

Dispela em i toktok bilong Pierre Elias, Sif Eksekutyutiv Opisa (CEO) bilong SourcePacifique.

Mista Elias i kam raun long Pot Mosbi long laspela wik long bungim sampela wokman bilong oil na ges kampani na salim sampela kompiuta softwe na teknologi.

Em i les long tokaut long wanem kain teknologi stret na wanem ol sofwe bilong kompiuta em i kam salim long ol kampani long PNG bikos em i no stretim wanpela samting ol i kolim ‘patent’.

Em i les long tokaut long wanem ol oil, ges na maining kampani i kastoma bilong en long PNG bikos kampani bilong em i wanpela liklik teknologi kampani na em i tingting long mekim ol arapela samting gut bipo long em i ken tokaut klia long pablik.

Kampani bilong em SourcePacifique i gat het opis long Kwinslan, Australia na ol i gat bisnis patna bilong ol

i stap long PNG na Wes Papua, Indonesia.

Mista Elias i tok Pasifik rijon na Wes Papua long Indonesia em ol ki eria we SourcePacifique i lukluk long mekim bisnis na salim prodak bilong ol.

“SourcePacifique olsem wanpela teknologi na kompiuta sofwe kampani i laik mekim bisnis na sevim ol kastoma insait long Esia-Pasifik rijon. Mipela i save wok wantaim ol rijonal stratejik alaiens patna na ol edvaisa we ol i save givim mipela sapot na tok stia,” Mista Elias i tok.

Em i tok risos sekta long PNG i bin lukim gutpela wok kamap tasol taim prais bilong ol samting o komoditi i go daun long intenesenel maket, dispela i mekim ol kampani i kisim taim bikos sampela kampani i bin rausim ol wokman.

“Dispela kain hevi i kamap long intenesenel maket taim, ol kampani i stap long risos indastri olsem maining, wel na ges i mas redi long kirapim ol nupela teknologi long apim prodaksen bilong kampani,” Mista Elias i tok.

Em i tok global kompiuta sofwe na teknologi i wok long kirapim ol nupela samting long larim ol opresens bilong ol oil, ges na maining kampani i go gut yet maski ol i kisim taim long wanem samting i kamap long intenesenel maket.

SourcePacifique i gat 20 wol klas bisnis na dispela em

ol 5-pela Stratejik Alaiens Patna bilong sofwe na 15 trupela edvaisa bilong ol teknologi.



Petroleum indastri em i wanpela eria we teknologi na kompiuta softwe i save mekim wok i kamap isi tru na helpim kampani long sevim mani.

Mani bai no inap go insait hariap long SWF

INSTITUT ov Nesenel Afes Eksekutyutiv Dairekta Paul Barker i ting mani bai no inap go insait hariap long stabilaisesen fan bilong PNG Sovren Welt Fan (SWF).

Em i mekim dispela toktok long bekim toktok bilong Tresera Patrick Pruaitch i tok PNG bai gat SWF neks yia na gavman bai salim mani i go insait long dispela SWF akaun long namba

wan kwata bilong yia 2016.

“Wanpela as long kamapim SWF em long stopim baset defisit na larim PNG i kamapim balens baset o baset saplas,” Mista Barker i tok.

Mista Barker i tok taim em i lukluk long ol samting i kamap long kantri na ausait wantaim, i luk olsem PNG SWF bai kamap long yia 2020.

“Nau yet prais bilong ol komoditi olsem gol, kopa, oil

na ges long intenesenel maket i go daun. Sapos komoditi prais i go antap, ating PNG bai mekim planti mani na sampela bilong dispela mani i ken go insait long SWF,” Mista Barker i tok.

Em i tok planti samting i save kamapim prais bilong ol samting long intenesenel maket long go daun o go antap.

“Pait na trabel long Midel

Is, winta sisen long Noten Hemispia, na ol arapela samting i save kamapim prais bilong komoditi o ol samting long go antap na go daun,” em i tok.

Mista Barker i ting mani bai no inap go insait long SWF hariap bikos kantri i no kisim yet LNG we mani gavman inap long kisim long 19.6 pesen sea em i gat aninit long Kumul Petroleum.

Kumul Petroleum em i namba 3 bikipela seaholda o projek patna bilong dispela K43 bilien PNG LNG Projek we ExxonMobil i ranim.

Las wik Tunde long Palamen Haus taim Tresera Pruaitch i toktok long 2016 Nesenel Baset, em i tok PNG SWF bai kamap neks yia, 2016.

Mista Pruaitch i tok stat long neks yia namba wan Kwata, ol mani gavman bai kisim long ges, oil, gol na ol arapela risos bai i go insait long SWF.

“Mi amamas long tokim yupela olsem ol mani gavman bai kisim long ol risos projek bilong kantri bai go insait stret long Sovren Welt Fan stat long neks yia namba wan kwata,” Mista Pruaitch i tok.

Tasol PNG i no kisim yet LNG mani i kam long PNG LNG Projek. Gavman i no tokaut klia long we stret dispela bikipela mani tru i stap.

Praim Minista Peter O’Neill i no mekim wanpela toktok ples klia long kliam tingting bilong ol pipel bikos planti ol manmeri i paul yet long PNG LNG Projek mani.

Oposisen lida Don Polye i tok tenkyu long Tresera Pru-

aitch long dispela plen bilong en long larim SWF i kamap neks yia tasol em i no ting dispela bai kamap tru.

“LNG mani i no kam insait yet long kantri na mi laik askim praim minista long tokaut klia long pipel. LNG mani i stap we? Na SWF bai kamap olsem wanem? Gavman i mas tokim pipel bilong dispela kantri olsem wanem ol bai yusim LNG mani i kam insait na putim long SWF,” Mista Polye i tok.

Long mun Julai dispela yia, gavman na oposisen wantaim i wanbel na kamapim Ogenik Lo bilong PNG SWF. Dispela ogenik lo i tok orait long PNG SWF bai gat tupela liklik fan ol i kolim Stebilaisesen Fan na Sevings Fan.

Gavman bai yusim ol mani i stap insait long Stabilaisesen Fan long kamapim ol nesenel baset bilong yia 2017 na ol arapela yia long bihain taim.

Nupela opis o seketeriet bilong PNGSWF bai kamap klostu taim tasol na ol bikipela saveman na ol man husat i gat klinpela rekot long kantri bai kamap bod ov dairekta bilong lukautim mani bilong pipel bilong PNG i stap insait long PNG SWF.



Tresera Patrick Pruaitch, Praim Minista Peter O’Neill na Fainens Minista James Marape long PNG LNG Plent sait las yia.

Ol skul long Manus kisim ol klaimet senis risos matiriel



Ol komyniti lida soim ol posta bilong klaimet senis.

Wanpela konsevesen sit i kamap long Westen Pasifik: soim pailot program bilong PNG

Stori i kam long TIRN

TENPELA yia i go pinis, Turtle Island Restoration Network (TIRN) i bin go pas long wokim edvokasi na pablik awenes kempein long sevim ol Pasifik Ledabaksait trausel bilong solwara.

Tasol mipela i wok long planim tu ol sit bilong wokim ol konsevesen muvmen long Westen Pasifik rijon. Nau 10-pela yia bihain, mipela i lukluk bek long wanem wok i kamap pinis.

Trausel Ailan Ristoresen Network i bin statim wanpela kempein long bihainim ol ripot bilong ol saientis we i bin tokaut long hevi bilong namba bilong ol Pasifik Ledabaksait solwara trauels i wok long go daun long 90 pesen. Ol dispela kempein i gat ol strongpela ligal eksen long winim fiseri klosa, ful pes advetismen, konsiuma kempein na wanpela muvi piksa.

Taim sampela ol wok bilong mipela i makim indas-

triel fising operesen, mipela i wokim tu wanpela liklik kempein long wok wantaim ol komyniti long PNG long ol bai lukautim ol ples we ledabaksait solwara trausel inap long hait na putim kiau long kamapim ol bebi trausel na ol kaikai samting long solwara.

Ledabaksait solwara trausel em ol lain bilong swim i go i kam long kain kain ples, na olsem ol ledabaksait we i save swim long solwara bilong California nambis long Amerika (we hetkwata bilong Trausel Ailan i stap) planti taim i save swim i kam long Wes Pasifik. Bikpela hap bilong ledabaksait trausel i save putim kiau long nambis em long Westen Pasifik Rijon na ol kantri olsem Indonesia (Irian Jaya) na Papua Niugini.

Long yia 2006, Trausel Ailan i kamapim pes bilong en long Papua Niguni long taim mipela i kisim wanpela Papua Niugini man, Wences Magun long kamap Westen Pasifik Kempeina bilong mipela.

Ledabaksait trausel em i bikpela bilong ol 7-pela kain trausel. Em inap long gro i go longpela inap long tupela mita mak. Ol inap long swim insait long kol ples na long hot ples wantaim na ol i save long senisim bodi tempresa bilong ol. Ol inap long go daun insait long solwara wankain olsem ol bikpela smuk pis ol wail i long 1000 mita insait long solwara.

Dispela trausel em i save karim planti kiau long wanpela taim olsem 60-85 7-pela taim insait long wanpela sisen long 2-4 pela yia. Ol i save kaikai tasol ol jelly pis tasol. Nau bihain long dispela dispela kain ledabaksait trausel i stap long moa long 100 milien yia, em i wok long pinis na em i stap long ret lista bilong IUCN Endensa Sipsis.

Ol gutpela lain olsem Trausel Ailan Ristoresen Network i wok kempein insait long Papua Niugini na Westen Pasifik long lukautim ol dispela trausel.

Stori i kam long WCS PNG

FOAPELA praimer skul long Pomuti, Ndrehet, Kurti na Andra Lokal Level Gavmen (PNKA LLG) bilong Manus Provins i kamap namba wan long kisim ol edukesenel risos matiriel bilong klaimet senis i kam long Wildlife Konsevesen Sosaiti (WCS) PNG program.

Tulu, Bundralis, Ponam na Andra praimer skul i kisim 6-pela kopi bilong wanpela klaimet senis tisa risos buk na 5-pela kopi bilong tupela narapela kain klaimet senis posta na ol narapela samting long las wik.

Tripela kopi bilong ol risos buk em ol i bin givim long provinsal edukesenel divisen pastaim long ol i givim i go

long ol praimieri skul.

Dispela risos buk em ol i bin kamapim aninit long klaimet senis adaptesen projek bilong WCS we ol i mekim wok wantaim ol narapela oge-naisesen long Manus. Dispela risos buk i gat ol lesen na ol wok bilong klaimet senis, na wanem samting em bai mekim long ol komyniti long redi long ol senis bai kamap. Em i helpim ol tisa long skulim ol sumatin.

WCS Manus program opisa, Sylvia Noble i givim aut ol matiriel na i tok olsem ol tisa i bin amamas long WCS long dispela helpim.

Bundralis Praimer skul het masta, Vincent Ngih i tok bai yumi no inap kirap nogut long ol bai gat wanpela kwesten bilong klaimet senis insait long gret 8 nesenelek eksem.

"Klaimet senis em i wok long senisim laip stail na we i bilong mipela long ples. Mipela nidim dispela kain matiriel long opim tingting bilong ol sumatin long luksave long ol kain samting bilong redim ol long na ol rot ol i ken bihainim long senis," Mista Ngih i tok.

Hetmasta bilong Ponam praimer skul, Paul Pau i tok risos buk bai sapotim sabjek stren insait long karikalam bilong 'Making a Living'.

WCS Manus bai givimaut ol dispela matiriel long ol skul insait long Pobuma LLG long wik bihain.

Australia Gavman Dipatmen bilong Foren Afes na Treid (DFAT) i bin helpim WCS wantaim mani bilong kamapim klaimet senis inisiativ long PNG.

Ramu NiCo Givim Olpela Oil long Ramu Agri



KURUMBUKARI nikel/kobalt main bilong Ramu NiCo (MCC) i save givim samting olsem 8,000 lita olpela o weist oil i go long Ramu Agri Indastri long yusim long ol masin bilong en.

Olgeta wik Ramu NiCo (MCC) i save wokim dispela bihain long tupela kampani i sainim wanpela agrimen long mun Janueri 2015.

Ramu NiCo (MCC) i stat long givim ol olpela oil bilong en stat long Ogas 3, 2015, na i bin stat wantaim moa long 60,000 lita weist oil we ol trak bilong en i karim i go long Ramu Agri Indastri long Gusap.

Dispela saplai bilong weis oil i bilong Ramu NiCo i lukautim gut ol pipia bilong

en aninit long Operesenal Envairomen Menesmen Plen (OEMP) em Konsevesen Envairomen na Proteksen Atoriti (CEPA) olpela i givim tok orait long en long Septemba 7, 2015. CEPA em nupela nem bilong pastaim Dipatmen ov Envairomen na Konsevesen (DEC).

Weist oil menesmen i go aninit Hasades Matiriel we i stap insait long 20 sab-pulen bilong OEMP long daunim ol hevi we i ken kamap long bus, graun, wara na solwara.

Ramu NiCo i save yusim ol trak bilong en long karim 6-pela ISO kontena em 6000 lita em dispela 3-tan trak i save yusim tupela ISO kontena we i ken holim 2,000 lita weis oil na insait long wan-

pela wik em i olsem 8,000 lita.

Dispela trak we i karim ol weist oil em ol lain Imejensi Rispons Tim (ERT) we i save go wantaim ol sefti samting i save was long en nogut oil i kapsait o birua i kamap long rot.

Planti ol dispela weist oil i save kam long ol disel pawa plent jenereta, ol pamp na ol hevi masin. Pastaim long agrimen, ol arapela pipia oil na ol arapela marasin nogut i save go long sefti weahaus long eria bilong wok.

Aninit long kontrak, Ramu NiCo i save baim RAIL 15-toea long wan lita na i save baim tu kost bilong transpot i go long Ramu Suga long bringim ol weist oil.



PNG Tim.

PNG Air em i balus bilong PNG



Praim Minista O'Neill i sanap wantaim ol bod memba bilong PNG Air long raithan bilong en na ol memba bilong Palamen long lephan bilong em.

MRDC na Nasfund kamap tupela bikpela seaholda



CEO bilong Nasfund, Ian Tarutia (raithan) i sanap wantaim ol wokmeri bilong PNG Air na Kantri Menesa bilong Newcrest Maining, Peter Aitsi.



Praim Minista O'Neill i katim ribon long opim nupela ATR 72-600 balus bilong PNG Air.



Sif Opereting Opisa bilong PNG Air, Paul Abott (name) i sanap wantaim tupela PNG Air wokman long Daru ples balus.

Airlines PNG i senisim nem bilong en i go long PNG Air. Na dispela nupela nem i soim olsem PNG Air em i balus bilong ol manmeri PNG stret.

PNG Air bai senisim ol olpela Des 8 balus bilong ol na long statim dispela senis, wanpela nupela kain balus i no stap long PNG long en i kam insait pinis long kantri.

Nem bilong dispela balus em ol i kolim ATR 72-600 na ol i mekim dispela balus long kantri Frens. PNG Air i baim dispela nambawan ATR balus long mani mak US\$20 milien (moa long K60 milien) na dispela balus i kam insait long kantri las wik Trinde.

Dispela balus em i nupela stret na sefti stendet bilong en i stap antap na em i moa seif long ol pasindia i ken sindaun na go kam long ol ples we ol i laik go long en.

I no long taim PNG Air bai gat moa long 10-pela ATR

72-600 i ran i go kam long ol ples balus insait long PNG we Airlines PNG i save ran na sevim ol manmeri.

Long las wik Fonde, Praim Minista Peter O'Neill, Sif Ekseketiv Opisa bilong PNG Air Muralee Siva, Bod Siaman bilong PNG Air Murray Woo, Sif Opereting Opisa bilong PNG Air Paul Abott, Mensesing Dairekta bilong Mineral Risos Developmen Kampani (MRDC) Augustine Mano na ol arapela memba, gavman ministia na ol bisnis lida i bin tok welkam long dispela balus long Pot Mosbi.

Praim Minista O'Neill i tok tenkyu long bod, menesmen na ol seaholda bilong PNG Air long bilip long ikonimi bilong PNG na inves long ealain indastri long PNG.

Mista O'Neill i tok tenkyu long bilip strong long ikonimi na politikel stebiliti bilong PNG taim tupela kampani i wanbel long inves long ealain indastri taim ealain indastri long ol narapela kantri i wok long kisim taim.

"Mi laik tok tenkyu long MRDC na Nasfund husat i invest long ealain indastri. PNG em i wanpela kantri we ol manmeri i save yusim balus long go kam long narapela ples.

"Kantri bilong yumi i gat ol bikpela maunten, bikpela wara na i no isi long mekim rot long jonim ol ples. Mipela i nidim sapot bilong ealains indstri long helpim ol man-

meri na mekim laip bilong ol pipel io kamap isi.

"Wanpela samting mi laik tokim yupela ol seaholda na manmeri wok long ealain indastri em olsem dispela gavman bai kirapim ol ples balus na arapela ol samting bilong ealain indastri," Praim Minista i tok.

Siaman bilong PNG Air Murray Woo i tok moa long 10-pela nupela ATR balus bai kisim ples bilong ol olpela Des 8 balus.

"Mi amamas long tokaut olsem Airlines PNG bai no moa flai long ol skai bilong PNG. Ol nupela ATR balus bai kisim ples bilong ol olpela Des 8 bikos sefti bilong ol pasindia bilong balus o ol kastoma bilong mipela em i nambawan samting mipela i bilip strong long en.

"Long ranim ealain kampani, yumi mas mekim olgeta samting orait. Na mipela i mekim rait disisen long baim ol ATR balus long sevim pipel na tu long larim sefti bilong ol i stap gut taim ol i yusim balus bilong mipela long raun," Mista Woo i tok.

Stat long las wik Fonde, ol ensinia na pailot bilong PNG Air i bin testim dispela nupela ATR balus long lukim sapos balus i ken ran gut long ol ples balus long PNG.

Dispela test i lukim ol opisal bilong CASA PNG, ol senia menesmen tim bilong PNG Air na ol nius manmeri i flai go long olgeta ples

balus insait long PNG we PNG Air i save go.

Sif Ekseketiv Opisa (CEO) bilong PNG Air Muralee Siva i tok sefti stendet bilong PNG Air em i stap antap tru bihain long ol pailot na ensinia bilong balus i testim dispela nupela balus.

Stat long las wik Fonde, nupela ATR balus bai mekim test ran bilong en i go long olgeta hap bilong PNG. Dispela balus i go pundaun pinis long Lae, Alotau, Hoskins, Rabaul, Lihir, Daru, Kiunga, Goroka, Madang, Mt Hagen, Wewak na Popondetta.

Em bai flai i go long Mendi, Tari na Moro long dispela wik.

Balus i no bin bungim wanpela hevi o birua taim em i mekim ran bilong en i go long ol dispela ples balus.

Mista Siva i tok PNG Air i laik sevim gut tru ol manmeri bilong PNG na ol i baim dispela nupela balus.

"Mipela i laik sevim ol pipel gut. Sefti bilong ol pasindia bilong balus em i namba wan samting we mipela i lukluk long en," Mista Siva i tok.

Em i tok PNG Air em i balus bilong PNG stret na em i putim sefti bilong manmeri PNG i go antap.

"Dispela nupela ATR balus em i seif na mipela i amamas long sevim gut ol pipel. Kastoma bilong mipela i ken amamas long dispela nupela sevis we dispela nupela balus bai givim long ol pipel," Mista Siva i tok.



Oi PNG Air wokman long Kiunga ples balus i lukim nupela ATR balus.



Lo na oda aweanes long KBK Main eria kamap

Kombain lo na oda aweanes long Enekuai rilokesen eria long Kurumbukari maunten klostu long KBK main eria.



Ol sumatin long Emmanuel Christian Academy School long Enikuai Rilokesen sait i pinisim skul long las Sarere. Gutpela edukesen na lotu pasin tasol bai senisim lo na oda pasin insait long komyuniti



OL PAPAGRAUN na ol pipel husat i stap insait long spesel maining lis (SML) eria na ol ples klostu long Ramu NiCo Kurumbukari main i mas stopim pasin bilong dring na salim yawa, simok mariwana na salim bia na ol narapela samting we i no bihainim lo.

Dispela em wanpela strongpela tok-lukaut i bin kamap las wik insait long wanpela kombain lo na oda aweanes we Ramu NiCo (MCC) wantaim gavman opisa bilong Walium distrik opis wantaim polis i mekim, long Daunagar na Enekuai rilokesen long las wik Fonde na Fraide.

Bundi sab-distrik edministreta, John Kari i tok olsem lo na oda hevi insait long Bundi LLG i ken givim hevi tu long Ramu NiCo Projek. Olsem na dispela em bikipela wari long Bundi distrik, na em i askim ol papagraun long soim gutpela pasin bilong rispek na bihainim gut lo na oda long lukautim Ramu NiCo Projek.

"KBK Main i kamapim planti wok we ol papagraun i wok mani long lukautim ol yet na bilong wanem bai yupela i bagarapim dispela projek na kamapim planti hevi long Ramu NiCo," Mista Kari

i tokim ol pipel.

Edukesen Program Menesa bilong Usino-Bundi, Jeffrey Lemek i tok olsem pasin bilong bikhet em as tru bilong lo na oda hevi, olsem na ol papagraun i mas senisim pasin bilong ol na kamap gutpela manmeri.

Mista Lemek i tok Ramu NiCo (MCC) i kam long divelopim nikel projek long PNG na bai stap long kantri moa long 20 yia. Olsem na ol papagraun i mas kamap poroman wantaim dispela divelopa na olgeta wantaim i ken amamas wantaim.

"Wok bilong mipela olsem papagraun em long wok klostu wantaim MCC husat em divelopa wantaim ol sapot i kam long gavman. Olsem papagraun, mipela mas save olsem MCC i wokim wok bilong em aninit long lo na regulesen Gavman i putim, olsem na yumi olgeta i mas wok wantaim," Mista Lemek i tok.

Em i askim olgeta papagraun long larim ol tingting nogut na pasin nogut ol i gat long sait na wok bung wantaim Ramu NiCo long wokim kamap gutpela faundesin o ples long lukim ol gutpela kaikai i kam.

"Mipela i no inap long gat polis long Usino na Bundi.

Tasol bikhet pasin tasol bilong mipela i bringim ol i kam," Mista Lemek i tok.

Em i tok olsem lo na oda hevi em i no bilong polis tasol. Em sosel hevi we olgeta lain i mas bung wantaim long stretim.

Helt Program Menesa long Walium, Carlson Suwemo i tok planti man bilong Usino-Bundi distrik i save go long Walium helt senta long kisim marasin bikos hevi bilong dring na spak na wokim trabel. Pasin bilong dring yawa na smok mariwana tu kamapim ol kros-pait na bringim hevi long ol manmeri.

Ramu NiCo Komyuniti Afes Supavaisa, Greg Tuma i tokim ol lokal pipel olsem MCC nau i gat rait aninit long lo long Spesel Maining Lis (SML) eria, olsem na em i no laik lukim ol trabel na sosel hevi i kamap.

"Mipela no laikim hevi kamap long lo na oda. Sapos mipela painim wanpela man i kamapim hevi long komyuniti i laik stopim operesin bilong kampani, mipela bai no inap westim taim long putim em long han bilong lo stret," Mista Tuma i tok.

Olsem wanpela papagraun em yet, Mista Tuma i tok em i no amamas taim em i lukim ol yut long Enikuai na Daunagar

i wok long smok spak brus, dring yawa na kamapim planti hevi long komiuniti.

"Mipela i bin wok hat stret long kisim dispela projek i kam na nau yumi mas lukautim na wok mani na kamapim gutpela sindaun. Pasin bilong spak na biket i mas stop nau," Mista Tuma i tok.

Em i tok tu olsem KBK Main aninit long Ramu NiCo i kamapim wanpela polisi long bai kisim ol wok man husait i gat Gret 8 save tasol na askim ol papagraun long stat go long skul long painim wok.

Ol polis mobail i lukautim KBK Main i tok ol i bai mekim save long ol lain husat i laik kamapim biket pasin insait long komiuniti na putim long han bilong lo stret.

Polis i tok tu olsem lo long mekim save long man husat i dring yawa na kisim spak brus em antap tru long baim moa long K1,000 o tupela krismas na ol man na meri husat i laik biket i mas kisim was na tingting gut pastaim.

"Sapos yu wanpela man husait i laik kamap bikipela man na ain man bai mipela mekim yu kamap liklik mangi na tromoi yu long Ramu Polis Stesin na go kisim holide long hap," Polis i tok.

Dispela kombain aweanes em Ramu NiCo KBK Main

Menesmen i laikim kamap bikos long planti hevi long sait long dring bia na yawa na kisim spak brus na wokim trabel, na tu pasin bilong salim yawa (homburu), smok mariwana na tu stil pasin long ol samting bilong kampani.

Mista Tuma i tokim ol pipel olsem sapos husat lain i laik stopim wok maining long laik

bilong em yet, em i brukim lo na MCC bai bringim em long Kot.

"KBK Main i stap aninit long lukaut bilong PNG Maining (Sefti) Ekt 1977 na Maining (Sefti) Regulesin 1935, we i go wantaim Regulesin, Seksen 284 na Kampani i ken bringim ol hevi long Kot sapos hevi kamap" KBK Main Menesmen i tok olsem.



Greg Tuma tok ol papagraun i mas lukautim KBK Main na Ramu NiCo Projek.



Ramu NiCo Management (MCC) Ltd,
 the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
 in Madang
 Date: August 22-25, 2015
 Venue: DWU & PNG Maritime College



Win bilong Cowboys em i narapela kain stret



WIN bilong Not Kwinlan Cowboys em i wankain olsem wanpela tumbuna stori bikos birua tim bilong ol, Brisbane Broncos, i stap pas wantaim 4-pela poin long klostu taim ol i laik bungim pinis bilong namba tu hap bilong pilai.

I gat sampela sekens i stap yet na ol Cowboys i bin putim trai na i bungim skoa bilong ol Broncos na top pilai bilong ol Jonathan Thurston i misim kik, we ol i ken kisim tupela moa poin na win long en.

Dispela i mekim na ol i bin givim golden taim long pilai na Thurston gen i bin kisim fil gol long pinis pilai bilong ol na winim gren fainel.

Win bilong ol i mekim na ol-

geta strit long asples bilong ol, Townsville, mekim planti nois.

Ol sapota bilong Broncos i bin isi tasol i go ausait long pilai graun bihain long pilai.

Ol sapota bilong Cowboys husat i save stap long hap bilong ol Broncos i bin amamas tu, taim ol i bin lukim Thurston i toktok long televisen.

Sapota bilong ol Broncos, Tyrone Holamotu, i tok em i no pilim orait.

"Mi bin kirap nogut bikos mipela i no ting olsem Cowboys bai inap long kisim dispela poin long las seken," Holamotu i tok.

Strongpela sapota bilong Broncos, Josh Bennett, i tok olsem win bilong Cowboys

em ol i bin pilai long win olsem na ol i win.

"Ol i bin pilai gut tru olsem i no gat wanpela lain i save lukim dispela kain pilai i save kamap long gren fainel bipo em i bin kamap," Bennett i tok.

Olgeta hap long Brisbane i gat strongpela sapot i bin kamap bilong tupela tim wantaim.

Deputi Meya bilong Townsville, Vern Veitch, i tok olsem dispela mak em mi no bilip long ol Cowboys bai kisim tasol ol i bin kisim na, em i wanpela namba wan gren fainel i bin kamap.

"Dispela pilai i bin kirapim tingting na biknem bilong Townsville," Veitch i tok.

Taupau bai pilai wantaim ol Manly nau



MARTIN Taupau, husat i pilai bilong ol West Tigers bipo na nau em i joinim ol Mainly Sea Eagles.

Dispela em i hait dil ol i bin mekim tasol wanpela man Kenada i bin tokaut long dispela dil na Manly i sainim fowod bilong ol Tigers long sait bilong Sea Eagles nau.

Sea Eagles i sainim nem bilong Nu Silan pilaia, Taupau, inap long 4-pela yia kontrak, tasol bipo long ol i sainim kontrak, ol i no bin luk-save na salim kontrak bilong em aninit long nem bilong dispela man Kenada, Martin James Kelleher Nestruck, bikos tupela i gat wankain nem long imel edres.

Nestruck i putim dispela nius long Twitter na em i bin tok olsem em i bin kisim wanpela pepa we ol i bin asua long salim i go long em na olgeta lain i bin lukim long dispela.

Dispela asua ol i bin mekim i mekim na Nestruck i kamap wantaim wanpela hatpela nius topik long Twitter long Sydney, tasol dispela em namba wan na i no gat wankain nius bai kamap gen.

Poro pilaia bilong Taupau, Darryl Mather, i tok olsem dispela nius bilong Nestruck em i kirapim, tasol em i bin kamapim rot bilong tupela tim long mekim toktok.

Bihain, tupela tim i kamap

wantaim wan wan stetmen bilong tupela na i strong kontrak bilong em.

Taupau, husat i gat 25 krismas, nau bai joinim ol Sea Eagles long yia i kam, 2016," wanpela klap long Manly i tok.

Taupau i stap long Yunnaitet Kingdom (UK) long sait bilong Nu Silan na i tok, em i lukluk long dispela sans long pilai wantaim ol namba wan pilaia bilong gem olsem Jamie Lyon, Brett Stewart na Daly Cherry-Evens.

"Dispela em i nupela stat bilong Sea Eagles aninit long nupela het kosa, Trent Barrett, na mi lukluk long pilai aninit long em," Taupau i tok.

Arsenal na City i dro; Crystal daunim Liverpool



ARSENAL i tingting long daunim lida bilong Premia Lig, Manchester City, tasol ol i bin kisim wankain poin 1-1 na Arsenal i belat.

Long wankain taim, Juer-gen Klopp, husat i menesa bilong Liverpool i save win olgeta taim long pilai bilong em inap long em i bin kamap menesa, tasol em i bin testim lus long namba wan taim stret, taim Creystal Palace i

daunim sait bilong em 2-1 long Anfield.

Nau, Premia Lig i kisim malolo liklik inap long tupela wik bilong intanesenel pilaia bai kamap.

Menesa bilong Arsenal, Arsen Wenger, i tok, "Dispela em i wanpela strongpela pilai i bin kamap."

Long namba tu hap bilong pilai, tupela tim wantaim i bin pilai strong na Asenal i bin

kisim wanpela poin tasol, City i bin kisim wanpela poin tu long namba 15 minit.

"City na mipela i bin kisim wankain poin na Liverpool i win na Palace i win, soim olsem dispela lig em i wanpela hatpela lig stret," Wenger i tok.

Arsenal i stat long pilai gut tasol, City i strong no gut tru long namba tu hap bilong pilai na kamapim dro.

Agnieszka Radwanska i winim WTA Fainel



MERI bilong amamas, Agnieszka Radwanska, i winim WTA Fainel tenis taitel na em i namba wan taim win bilong em wantaim rola inap long kosta 6-2, 4-6, 6-3 na, daunim, Petra Kvitova, long Singapore Indo Stediam.

Em i bin pilai namba wan fainel bilong em na i bin kamaut long namba 7 na las sisen bilong pinisim pilai.

Kvitova i luk daun long Radwanska bikos em i bin kamap sempion long 2011 na Radwanska i winim Maria Shrapova long emi-fainel tasol.

Long dispela as, Kvitova i

no statim pilai bilong em strong na i givim birua gutpela taim bilong malolo.

Bihain, Kvitova i bin go insait long skoa bod long namba 3 pilai, tasol em i no bungim ol rot we Radwanska i go long en na narapela taim bilong malolo i kamap.

Radwanska i go insait long narapela tupela sevis pilai bilong em na bungim namba wan win bilong em long 33 minit na rausim Kvitova i go aut long kot o pilai graun na i winim tupela pilai.

Kvitova i bin traim hat long daunim Radwanska, tasol

em i no inap bikos em i bin sik long mun Ogas na em i bin hat tumas.

Bihain long tripela pilai, Kvitova i pilai strong gen na bungim skoa bilong en 3-3.

Tasol long las minit, Radwanska i daunim Kvitova na putim em long namba tu ples.

Long fainel bilong dabol iven, top pilaia Martina Hingis na Sania Mirzai winim namba 9 taitel bilong namba wan sisen bilong ol wantaim 6-0, 6-3 na daunim pilaia bilong Spein, Garbine Muguruza na Carla Suarez Navarro.

POMRFL i stopim ol sapota

Philemon Tame i raitim

POT MOSBI Ragbi Futbol Lig (POMRFL) i stopim ol sapota husat i kirapim birua pasin long taim bilong pilai.

Long eliminesen fainel bilong ol man na meri i bin kamap long Murray Bareks pilai graun long las wik Sande i soim olsem planti sapota i bin tok nogutim na laik paitim ol opisal bilong mets na ol pilaia tu.

Operesen Menesa bilong POMRFL, Meke Maino, i tok ol bod bai bung long dispela wik long toktok long paini-

maut wanpela rot bilong kontrolim dispela kain pasin bilong ol sapota na ol manmeri husat i lukim pilai i stap.

"Sapos mipela i tingting long mekim olsem, em mipela bai stopim ol sapota long kam long ol fainel long dispela wik na wik i kam tu, na tu mipela bai no inap larim ol long kam insait long ol POMRFL pilai," Maino i tok.

"Wanpela bikpela samting em, klap bai baim sapos i gat sampela bikpela bagarap bai kamap long ol propeti o opisal, o sapos ol sapota i paitim wanpela pilaia."

"Taim dispela ol birua

pasin i no bin kamap yet, pilai tu i no bin kamap orait na dispela em i no gutpela sain bilong POMRFL," Maino i tok.

Em i tok tenkyu long wok ol soldia bilong Papua Niugini Difens Fos i bin mekim long larim pilai graun i stap klin.

"I gat 8-pela soldia i bin stap long wok long taim ol i bin pilai na mipela i laikim moa soldia i ken wok long taim bilong pilai, tasol baset bilong mipela i no laikim dispela i ken kamap. Ol pipel i mas lainim gut long givim rispek long wanpela na narapela," Maino i tok.

BSP Heart i win long Gabba Sempion Shield

BSP HEART i winim Gabba Sempion Shield bilong ol man wantaim 8 wiket na i daunim ol ANZ Avalanches long 50 ova fainel long Amini Pak pilai graun long las wik Sande.

Ol ANZ i stap pas we ol i bin bowlim aut 80 bihain long 23.2 ova.

Opena Jack Vare i gat 20 krismas na Charles Amini

Junior i gat 29 krismas em tupela betsmen husat i kisim ol skoa long 20.

Bese Bua husat em i pilai bilong ol BSP Heart i kisim skoa wantaim 5-pela wiket long 6-pela ova. Em i bin pinisim skoa lain wantaim 5/15.

Long ran bilong BSP yet, Bau i bin kisim moa skoa yet gen wantaim bet 38 ran we no gat wanpela i bin daunim

em. Assad Vale i helpim em na i kisim 31 skoa.

BSP i lus wantaim 2-pela wiket taim ol i pinis makim isi bihain long 11.2 ova. BSP i pinis long 2/81 long skoa lain.

Long narapela 50 ova pilai ol i bin pilai em ol Digicel Dragon i daunim ol Paradise Foods Pistons Colt pilai graun wantaim 83 ran.

Nupela Toyota Hilux 6th Element i stap long PNG

Philemon Tame i raitim

NUPELA jeneresen Toyota Hilux em ol i bin lonsim long las wik Fraide nait long Rita Flynn spot kompleks long Bisini na ol i bin kolim 6th Element.

Namba 6th Element em namba 8 jeneresen bilong Toyota Hilux model na namba wan jeneresen em ol i bin lonsim long 1968.

CEO bilong Ela Motors, Takeshi Abe, i tok, "Mipela i lonsim dispela 6th Element i soim olsem mipela bai kisim PNG i go long narapela level olgeta."

Em i tok moa olsem Ryan Pini em i nupela embaseda bilong dispela nupela Toyota Hilux model na dispela em i bikpela samting na namba wan piksa bikos em i namba wan pilaia bilong spot aninit long swimming long PNG.

Dispela piksa i soim namba wan swima, Ryan Pini, i soim medal em i bin win long wanpela pilai i kamap long Melbon, Australia. *Poto: Intanet*



Pini i tok em i gat bikpela amamas long lonsim dispela nupela kar.

"Wankain olsem long spot, mipela i save mekim planti hat

wok long karim kaikai long ol wok mipela i save mekim na Ela Motors i bin wok hat tru long kam aut wantaim dispela 6th Element," Pini i tok.



Piksa i soim nupela jeneresen Toyota Hilux we namba wan swima bilong Papua Niugini, Ryan Pini, bai kamap nupela embaseda bilong en.

PNG em namba wan hap bilong wol iven

PAPUA Niugini em i namba wan na hait hap bilong wol sefing iven.

Representativ o maus man bilong Wol Sefing Lig (WSL), Steve Robertson, i tok planti pipel long olgeta hap long wol i bin tok long gutpela bilong sef na ol namba wan arere bilong solwara long PNG.

Robertson i go lukim Tupira Sef Klap (TSC) long Madang Provins, na i tok long kamapim gen WSL pilai long namba wan taim long PNG long yia i kam, 2016.

"I no gat wanpela toktok ol pipel i bin mekim long ol sef i save kamap long PNG, tasol ol liklik tok win mi harim em i orait," Robertson i tok.

"Long lukluk bilong mipela, mipela i amamas long kisim dispela pilai i go long ol hap we i gat bikpela weiv bilong solwara na mipela i harim olsem PNG i gat dispela kain hap."

Em i save i go pas long ol wol sefing iven long olgeta hap bilong wol olsem Tahiti, Fiji, China, Indonesia na Hawaii.

"Tupiri bai kamap wanpela hap bilong salensim ol pilaia stret bikos em i long we hap, tasol ol pilaia i save laikim dispela kain hap na i amamas long lukim dispela kain bikpela weiv na i amamas tu long wokabout bilong ol long kam long PNG," Robertson i tok.

Em i bin tok moa olsem, "Madang i gat ol bikpela weiv na ol dispela kain weiv em i namba wan stret bilong ol pilai bikos ol bai pilai gut na amamas stret.

Robertson i bin go long Tupira wantaim petron bilong Sefing Asosiesen bilong Papua Niugini (SAPNG) na faunda bilong TSC, Jastis Nicholas Kirriwom, na SAONG Presiden, Andrew Abel.

Dispela tim em ol i bin go long Tupira long lukim weiv, na ol narapela samting olsem sekyuriti na haus bilong slip long hap bilong sef.

Na tu, ol i bin bungim ol asples na toktok wantaim ol long plen na menesmen bilong pilai.



Piksa i soim olsem dispela kain pilai bai kamap long Tupira, Madang long yia i kam, 2016, na dispela em i namba wan taim bilong dispela kain pilai bai kamap long PNG. *Poto: Intanet*

Kone Storms i daunim ol Kone Tigers long golden taim

Philemon Tame i raitim

PILAI bilong ol Kone Storms, Patrick Morea, long golden taim i skruim skoa bilong ol Storms i go antap, 14-6 na daunim brata tim bilong ol Kone Tigers long A gret eliminesen fainel bilong ol man long Pot Mosbi Ragbi Futbol Lig (POMRFL) long las wik Sande.

Long namba wan hap bilong pilai, wanpela asua i bin kamap long sait bilong ol Storms na ol Tigers i kisim namba wan poin we senta pilaia bilong ol Eke Eni i bin putim dispela trai.

James Kapi i isi tasol putim kik i go insait na ol i bin stap pas wantaim 6 poin.

Storms i strongim banis bilong ol bihain long ol Tigers i bin putim trai na i no bin givim wanpela sans long ol

long putim narapela trai gen inap ol i bungim pinis bilong namba wan hap bilong pilai.

Ol Storms i bekim trai bilong ol Tigers long namba 5 minit long namba tu hap bilong pilai we senta pilaia bilong ol, Joshua Thomas, i bin putim dispela trai.

Jerry Kare i skruim skoa i go antap long wankain skoa bilong ol Tigers.

Tasol, ol Tigers i stap pas yet we Kapi i kikim wanpela penelti i go insait long 30 mita skoa i sanap olsem 8-6.

Bihain long 5 minit taim ol Tigers i bin kisim penelti, Kare gen i kisim wanpela penelti na bungim skoa 8-8.

Bihain long dispela, pilai i bin strong tumas na ol i bungim pinis taim bilong namba tu hap bilong pilai.

Ol i bin givim golden taim long tupela tim na fowod pilai

bilong ol Storms, Morea, i ran strong long putim las trai bilong winim dispela pilai.

Ol Storms bai pilai long kwalifai fainel long dispela wiken egensim ol Royals.

Long ol narapela A gret kwalifai fainel, ol Saut bai pilai egensim ol Brothers bihain long ol Saut i daunim ol Bat-aplai 4-2 long las wik Sarere.

Long anda 19 eliminesen fainel bilong ol man Wes i daunim ol Dobo Warriors 8-5 na Wes bai pilai egensim ol Difens long kwalifai fainel long dispela wiken.

Long namba wan pilai i bin kamap long anda 19 eliminesen fainel bilong ol man, we ol Paga Panthers i strong tumas na i bin daunim ol Kone Storms 16-4.

Ol Panthers bai go het na pilai wantaim ol Brothers long namba tu kwalifai faine-

Hunters bai go long kemp long dispela mun

PAPUA Niugini SP Hunters bai go aut long kemp long Pot Mosbi long dispela mun, Novemba long statim treninig long pilai long Intras Supa Kap long yia i kam, 2016.

Kosa bilong Hunters, Michael Marum i tok ol pilaia bai go long kemp stat long Novemba 22.

Em i tok moa olsem 40 pilaia bai bung na kisim pri-

sisen treninig inap long 6-pela wik.

"Ol bai lukluk aninit long treninig na ol bai mekim las tim lista bilong ol Hunters long pilai long 2016," Marum i tok.

Ol Hunters i bin pinisim namba tri ples long las sisen bihain long Ipswich Jets i win 28-12 long preliminari fainel.

Ol Jets i winim gren fainel bilong Intras Supa Kap.



Sampela bilong ol Hunters pilaia bai soim pes gen long kemp bilong ol long dispela mun.

Hawks i winim K5000

TIM bilong ol meri, Niugini Elektrikel Hawks, long Madang Ragbi Lig Futbol Asosiesen i winim K5000 long gren gren fainel i kamap namel long ol Hawks na Not Raiders.

Hawks i kisim taitel bilong Duban Kap na ol Raiders i kamap namba tu ples na i kisim K2500.

Ol Raiders em ol meri long Riwo Viles long Not Kos we ol i bin kam wantaim sponsa bilong ol, Hook Kasses, na Deputi Gavana bilong Madang, Rama Marisan, wantaim olgeta sapota bi-

long ol.

Ol meri Hawks em ol i save i stap long Edministresen kompaun na i amamas long kisim kap i go long eria bilong ol.

Kepten bilong Hawks na huka pilaia, Lydia Suguman, i go pas na ol i go insait long pilai graun wantaim winga, Lace Kuni, husat i pilaia bilong tim bilong ol meri long Soka Pasifik Gem.

Ol narapela namba wan pilaia bilong Hawks em hap bek, Batsihba Kewa, faiv eit, Atua Areak, na senta pilaia, Kimberly Mamsu, i soim kala

bilong ol long taim bilong pilai.

Kepten bilong Not Raiders, Irene Dau, i pilai long senta na hap bek bilong ol em i Roselyn Martin. Pilaia husat i lukautim bak lain em i Grace Luke.

Pilai i kamap strong tumas long namba wan hap we tupela tim wantaim i soim kala bilong tupela inap long namba 20 minit bilong pilai.

Ful bek bilong Not, Roselyn Getawa, i bin lusim bal na ol Hawks i kisim strong we senta pilai, Magaret Rimba, i putim wanpela trai long wing, tasol Atua Areak i no bin putim kik i go insait.

Ol sapota i bin singaut taim Hawks i stap pas wantaim 4 poin, na taim i bungim pinis bilong namba wan hap bilong pilai.

Long namba tu hap bilong pilai, ol Raiders i pilai strong long bungim skoa tasol banis bilong ol Hawks i strong tumas na blokim ol long putim trai.

Taim 10-pela minit i stap yet, hap bek bilong ol Raiders i lusim bal na kepten bilong ol Hawks, Suguman, i pikim na pasim i go long prop, Dianne Kig, long skruim skoa i go antap long 8-0.

Raiders i traim strong yet long brukim banis, tasol ol Hawks i no bin givim sans long ol long putim trai.

Gren fainel bilong ol man bai kamap long dispela wiken na Minista bilong Petroleum na Eneji, Nixon Duban, ba givim prais long ol wina long wankain taim.

Pukpuk na Palai i go long Nu Silan long Osenia 7s

PAPUA Niugini Pukpuk na ol Palai i go long Nu Silan long pilai long 2015 Osenia 7s Sempionsip long dispela wiken.

Kosa bilong ol Palai, Sydney Wesley, i tok i gat liklik senis tasol i kamap long tim bikos sampela i kisim bagarap.

Ol nupela pilaia insait long tim em Helen Abau, Joylyn Tiko i go long tas ragbi intenesenel, na Debbie Kaore i go long boksen intenesenel. Kaore i kisim ples bilong Lynette Kwarula na em bai kamap kepten bilong ol

Palai. Dulcie Bomai em I go pas long wokabaut bilong ol pilaia.

"Fiji bai givim mipela bikpela salens, tasol mipela i makim long pinis long top" Wesley i tok.

Ol Palai bai pilai namba wan gem bilong ol egensim ol Kuk Ailan long Trust pilai graun long Sarere na ol Pukpuk bai pilai wantaim ol Amerika Samoa long wankain hap.

Sempionsip bilong 7s bai kamap long Novemba 14 inap long 15.

NSL bai stat long dispela mun

i kam long bek pes

Ol tim i kam aninit long Noten Konfrens em sempion Lae Siti Dwellers, Madang Fox FC, Goroka FC, Besta Yunaitet FC, Gigira Laitepo FC, na Admiralty FC.

Dispela resis bai kamap long Lae, Goroka, Madang na Bisini pilai graun long Pot Mosbi.

"Dispela toksave i soim olsem planti sanis i kamap long lig na i bilong kirapim stended bilong pilai futbol long kantri," Bod Siama bilong NSL, Isaac Lupari i tok.

Long wankain taim, Madang Soka Asosiesen (MSA) i laikim Papua Niugini Futbol Asosiesen (PNGFA) long rausim ol rul i bin putim long stopim ol Nesenel Soka Lig (NSL) pilaia long pilai long Besta Kap resis.

Presiden bilong MSA, Ray Romo, i tok Besta Kap fainel em i wanpela eksampel we 5-pela pilaia bilong NSL tasol i bin pilai long wan wan gem we 3-pela i bin go insait long pilai graun long pilai na tupela i stap long sait.

Romo i tok ol i rispektim ol rul, tasol dispela rul em i no orait long dispela kain gem olsem Besta Kap.

"As tingting bilong ol i no laikim dispela rul i ken kamap long Besta Kap bikos, Besta Kap tu em i semi profesenel resis na maus rot bilong bungim NSL," Romo i tok.

"Ol i ken larim ol dispela kain rul i ken kamap long ol narapela resis olsem PNG Gem na ol Provinsal Gem, bikos dispela rul i daunim spirit bilong ol tim na strong bilong ol pilaia long pilai i go het."

Em i tok moa olsem, "Taim resis i pinis, ol NSL pilaia i gat rait long pilai long ol lokal asosiesen na ol resis olsem Besta Kap, bikos ol i rejista pinis na i memba bilong ol lokal provinsal asosiesen."

Tim husat i kwalifai wantaim top ples bai kisim ples insait long Rio Olimpik resis bai kamap long yia i kam, 2016.

Namba tu na namba tri ples top tim em ol bai kisim invite-sen long fainel kwalifikesen tonamen bilong Rio Olimpik.



Sampela pilaia bilong PNG Pukpuk na Palai ragbi 7s i treninig bipo long go pilai long Osenia 7s long Nu Silan long dispela wiken.

40%

Specials available on selected routes

Reservations – Toll Free: 1800 5465, Email: sales.linkpng@airniugini.com.pg
 Find us on Facebook: www.facebook.com/linkpng
 Online sales: www.airniugini.com.pg

1st year Anniversary SPECIAL!

MERI KRIKET KOMPETISEN



Norma Ovasuru i redi long paitim bal long kriket pilai bilong ol.

Swire Shipping Sharks.



BASC DOLPHIN SPRINTS BILONG BOROKO AMATEUR SWIMMING CLUB

Anda 9 meri bilong Boroko Amateur Swimming Club i resis long BASC Dolpin Sprint kompetisen long wiken.



Oi anda 14 man na meri i redi long resis bilong long swim.




Oi anda 10 man na meri i putim was long taim bilong ol long resis.



Oi liklik long anda 9 i skin kirap long taim bilong ol long resis.



Wanpela mangi long anda 10 i resis long tasim pinis lain.



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by



RD Tuna Canners Ltd.

Moa mit na
oil insait



TUNA IN OIL

NSL bai stat long dispela mun



NESENEL Soka Lig (NSL) bai kamap long 2016 inap long 2017 bai stat long dispela mun, Novemba na, ol i bin mekim dro bilong ol tim pinis.

Menesa bilong dispela resis, Simon Koima, i tok NSL bod i tok orait long dro bilong pilai pinis.

Resis bai stat long Novemba 21 we 12-pela tim bai resis.

Ol tim i bin mekim tupela grup olsem Jon Konfrens lig na nesanel lig resis.

Ol tim i kam anit long Sauten konfrens em Hekari Yunaitet FC, Rapatona FC, Erema FC, PS Huawei FC, Pot FC Mosbi na Welgris FC.

...lukim moa
long pes 26

Tim Madang Fox bilong Madang long 2015 bai traim gen long 2016. Planti ol nupela pes bai stap namel long ol tim bilong NSL resis bilong dispela yia na 2016. Madang Fox i bin daunim planti ol bik nem tim bilong NSL long 2014 na 15 na dispela sisen ol tingting long kam bek strong moa.

Poto Nicky Bernard.

Strongpela Marasin Bilong Kus Gutpela Prais!

Good Products, Better Prices, ikam long

 **Johnstons Pharmacies Ltd**

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

